


甲



三五

列傳卷第五十

元史一百六十三

翰林學士吳瓘知制誥兼修國史吳濂翰林待制兼直節同知制誥兼國史院編修官吳壽等奉  
勅

李德輝

李德輝字仲實通州潞縣人。生五歲，父且卒，指德輝謂其家人曰：「吾為吏治獄，不任苛刻，人蒙吾力者，衆天或報之，是兒其大吾門乎？」及卒，德輝號慟如成人。適歲凶，家儲粟纔五升，其母舂蓬稗炊藜藿而食之。德輝天性孝悌，操履清慎。既就外傳，嗜讀書，束於貧，無以自資，乃輟業。年十六，監酒豐州，祿食充足，甘旨



有餘則市筆札錄書夜誦不休已乃厭糟麴歎曰志士顧安此耶事不足以匡君福民隱不足以悅親善身天地之間人壽幾何惡可無聞同腐草木也乃謝絕所與游少年求先生長者講學以卒其業時世祖在潛藩用劉秉忠薦使侍裕宗講讀乃與竇默等皆就辟癸丑憲宗封宗親割京兆隸世祖潛藩擇廷臣能理財賦者俾調軍食立從宜府以德輝與孛得乃爲使時汪世顯宿兵利州扼四川衿喉以規進取數萬之師仰哺德輝乃募民入粟綿竹散錢幣給鹽券爲直陸挽輿元水漕嘉陵末期年而軍儲充羨取蜀

之本基於此矣中統元年爲燕京宣撫使燕多劇賊造僞鈔結死黨殺人德輝悉捕誅之令行禁止然事多不白中書由是忤平章王文統意去位三年文統以反誅德輝遂起爲山西宣慰使權勢之家籍民爲奴者咸按而免之復業近千人至元元年罷宣慰司授太原路總管時潛藩故傳相無有出爲二千石者帝以太原難治故以德輝爲守至郡崇學校表孝節勸耕桑立社倉一權度凡可以阜民者無不爲之嘉禾瑞麥六出其境五年徵爲右三部尚書人有訟財而失其兄子者德輝曰此叔殺之無疑遂竟其獄權



貴人爲請者甚衆德輝不應罪狀既明請者乃慚服  
七年帝以蝗旱爲憂命德輝錄囚山西河東行至懷  
仁民有魏氏發得木偶持告其妻挾左道爲厭勝謀  
不利於己移數獄詞皆具德輝察其寃知其有愛妾  
疑妾所爲將構陷其妻也召妾鞠之不移時而服遂  
杖其夫而論妾以死皇子安西王鎮關中奏以德輝  
爲輔遂改安西王相至則視瀕涇營牧故地可得數  
千頃起廬舍疏溝澮假牛種田具與貧民二千家屯  
田其中歲得粟麥芻藁萬計十二年詔以王相撫蜀  
時重慶猶城守不下朝廷各置行樞密院於東西川

合兵萬人圍之德輝至成都兩府爭遣使咨受兵食  
方略德輝戒之曰宋已亡矣重慶以彈丸之地不降  
何歸政以公輩利其剽殺民不得有子女懼而不來  
耳嚮日兵未嘗戰中使奉璽書來赦公輩既不能正  
言明告嚴備止攻以須其至及購得軍吏赦之僞爲  
得罪使懼而叛去水陸之師雷鼓繼進是堅其不下  
也中使不諭詐計竟以不奉明詔復命如是者非玩  
寇而何況復軍政不一相訾紛紛朝夕敗矣豈能成  
功哉德輝出未至秦瀘州叛而重慶圍果潰再退守  
瀘州十四年詔以德輝爲西川行樞密院副使仍兼



王相諸軍既發德輝留成都給軍食是年復瀘州十年再圍重慶踰月拔之紹興南平夔施思播諸山壁水柵皆下而東川樞府猶故將也懲前與西川相觀望致敗惡相屬願獨軍圍合州德輝乃出合俘繫順慶獄者縱之使歸語州將張珩以天子威德遠著宋室既亡三宮皆北我朝含弘錄功忘過能早自歸必取將相與夏吕比又爲書以禮義禍福反復譬解之以爲汝之爲臣不親於宋之子孫合之爲州不大於宋之天下彼子孫已舉天下而歸我汝猶偃然負阻窮山而曰吾忠於所事不亦惑哉且昔此州之人不自爲謀者以國有主耻被不義之名故爾得制其死命主今亡矣猶欲以是行之則戲下盜遇君竊君首以徼福一旦不難也珩未及報而德輝還王邸既而合州遣李興張邵十二人調事成都皆獲之釋不殺復爲書縱歸使諭其將王立如諭珩者而辭益剴切立亦計夙與東府有深怨懼誅即使興等導帥幹楊獬懷蠟書間至成都降德輝從兵纔數百人赴之東府害其來皆曰公昔爲書招珩誠亦極矣竟無功而還今立珩牙校也習狙詐不信特以計致公來使與吾爭垂成之功延命畧刻耳未必誠降德輝曰昔



合以重慶存故力可以同惡今已孤絕窮而來歸亦其勢然吾非攘人之功者誠懼公等憤其後服誣以嘗抗蹕先朝利其剽奪而快心於屠城也吾爲國活此民豈計汝媼怒爲哉即單舸濟江薄城下呼立出降安集其民而罷置其吏合人自立而下家繪事之川蜀平復以王相還邸十七年置行中書省以德輝爲安西行省左丞是年西南夷羅施鬼國既降復叛詔雲南湖廣四川合兵三萬人討之兵且壓境德輝適被命在播乃遣安珪馳駟止三道兵勿進復遣張孝思諭鬼國趣降其酋阿察熟德輝名曰是活合州

李公耶其言明信可恃即身至播州泣且告曰吾屬百萬人微公來死且不降今得所歸蔑有二矣德輝以其言上聞乃改鬼國爲順元路以其酋爲宣撫使其後有以受鬼國馬千數詣德輝于朝者帝曰是人朕所素知雖一羊不妄受寧有是耶德輝卒年六十三蠻夷聞訃哭之哀如私親爲位而祭者動輒千百人合州安撫使王立衰經率吏民拜哭聲震山谷爲發百人護喪興元播州安撫使何彥清率其民立廟祀之

張雄飛



張雄飛字鵬舉琅琊臨沂人父琮仕金守盱眙金人疑之罷其兵柄徙居許州尋復命守河陰仍留家人於許雄飛幼失母琮妾李氏養之國兵屠許惟工匠得免有田姓者琮故吏也自稱能為弓且詐以雄飛及李氏為家人由是獲全遂徙朔方雄飛時方十歲至霍州李欲逃恐其累已雄飛知之頃刻不去左右李乃變服與俱還寓潞州雄飛既長往師前進士王寶英於趙城金亡雄飛不知父所在往來澤潞求之十餘年常客食僧舍已而入關陝歷懷孟潼華終求其父弗得遂入燕居數歲盡通國言及諸部語至元二年廉希憲薦之于世祖召見陳當世之務世祖大悅授同知平陽路轉運司事搜執蠹弊悉除之帝問處士羅英誰可大用者對曰張雄飛真公輔器帝然之命驛召雄飛至問以方今所急對曰太子天下本願早定以繫人心間閭小人有升斗之儲尚知付託天下至大社稷至重不早建儲貳非至計也向使先帝知此陛下能有今日乎帝方卧矍然起稱善者久之他日與江孝卿同召見帝曰今任職者多非材政事廢弛譬之大厦將傾非良工不能扶卿輩能任此乎孝卿謝不敢當帝顧雄飛雄飛對曰古有御史臺

元史列傳卷三十一  
六  
爲天子耳目凡政事得失民間疾苦皆得言百官姦邪貪穢不職者即糾劾之如此則紀綱舉天下治矣帝曰善乃立御史臺以前丞相塔察兒爲御史大夫雄飛爲侍御史且戒之曰卿等旣爲臺官職在直言朕爲汝君苟所行未善亦當極諫况百官乎汝宜知朕意人雖嫉妬汝朕能爲汝地也雄飛益自感勵知無不言叅議樞密院事費正寅素險狡有告其罪者詔丞相線真等與雄飛雜治之請托交至雄飛無所顧盡得其罪狀以聞正寅與其黨管如仁等皆伏誅會議立尚書省雄飛力爭於帝前忤旨左遷同知京

兆總管府事宗室公主有家奴逃渭南民間爲贅壻主適過臨潼識之捕其奴與妻及妻之父母皆械繫之盡沒其家貲雄飛與主爭辨辭色俱厲主不得已以奴妻及妻之父母家貲還之惟挾其奴以去入爲兵部尚書平章阿合馬在制國用司時與亦麻都丁有隙至是羅織其罪同僚爭相附會雄飛不可曰所犯在制國用時平章獨不預耶衆無以荅秦長卿劉仲澤亦以忤阿合馬皆下吏欲殺之雄飛亦持不可阿合馬使人啗之曰誠能殺此三人當以叅政相處雄飛曰殺無罪以求大官吾不爲也阿合馬怒奏出



元史卷之五十一  
七  
雄飛為澧州安撫使而三人竟死獄中時澧州初下  
民懷反側雄飛至布宣德教以撫綏之民遂安有巨  
商二人犯匿稅及歐人事僚佐受賂欲寬其罪雄飛  
繩之益急或曰此細事何執之堅雄飛曰吾非治匿  
稅歐人者欲改宋弊政懲不畏法者爾細民以乏食  
群聚發富家廩所司欲論以強盜雄飛曰此盜食欲  
救死非強也寬其獄全活者百餘人澧西南接溪洞  
徭人乘間抄掠居民雄飛遣楊應申等往諭以威德  
諸徭悉感服十四年改安撫司為總管府命雄飛為  
達魯花赤遷荆湖北道宣慰使有告常德富民十餘

家與德山寺僧將為亂眾議以兵討之雄飛曰告者  
必其仇也且新附之民當以靜鎮之兵不可遽用苟  
有他吾自任其責遂止徐察之果如所言先是荆湖  
行省阿里海牙以降民三千八百戶沒入為家奴自  
置吏治之歲責其租賦有司莫敢言雄飛言于阿里  
海牙請歸其民於有司不從雄飛入朝奏其事詔還  
籍為民十六年拜御史中丞行御史臺事阿合馬以  
子忽辛為中書右丞行省江淮恐不為所容奏留雄  
飛不遣改陝西漢中道提刑按察使未行阿合馬死  
朝臣皆以罪去拜參知政事阿合馬用事日久賣官



鬻獄紀綱大壞雄飛乃先自降一階於是僥倖超躐者皆降之忽辛有罪敕中貴人及中書雜問忽辛歷指宰執曰汝曾使我家錢物何得問我雄飛曰我曾受汝家錢物否曰惟公獨否雄飛曰如是則我當問汝矣忽辛遂伏辜二十一年春冊上尊號議大赦天下雄飛諫曰古人言無赦之國其刑必平故赦者不平之政也聖明在上豈宜數赦帝嘉納之語雄飛曰大獵而後見善射集議而後知能言汝所言者是朕今從汝遂止降輕刑之詔雄飛剛直廉慎始終不易其節嘗坐省中詔趣召之見於便殿謂雄飛曰若卿

可謂真廉者矣聞卿貧甚今特賜卿銀二千五百兩鈔二千五百貫雄飛拜謝將出又詔加賜金五十兩及金酒器雄飛受賜封識藏於家後阿合馬之黨以雄飛罷政詣省乞追奪賜物裕宗在東宮聞之命參政溫迪罕諭丞相安童曰上所以賜張雄飛者旌其廉也汝豈不知耶母爲小人所詐塔即古阿散請檢核前省錢穀復用阿合馬之黨竟矯詔追奪之塔即古阿散等俄以罪誅帝慮校核失當命近臣伯顏閱之中書左丞耶律老哥勸雄飛詣伯顏自辨雄飛曰上以老臣廉故賜臣然臣未嘗敢輕用而封識以俟



者政虞今日耳又可自辨乎二十一年盧世榮以言  
利進用雄飛與諸執政同日皆罷二十三年起為燕  
南河北道宣慰使決壅滯黜姦貪政化大行卒于官  
子五人師野師諤師白師儼師約師野宿衛東宮時  
荆湖行省平章政事阿里海牙入覲言之宰相欲白  
皇太子請以師野為荆南總管雄飛固止之歸謂師  
野曰今日欲有官汝者汝宿衛日久固應得官然我  
方為執政天下必以我私汝我一日不去此位汝輩  
勿望有官也其介慎如此

張德輝

張德輝字輝卿冀寧交城人少力學數舉於鄉金貞  
祐間兵興家業殆盡試掾御史臺會盜殺卜者有司  
蹤跡之獲僧匿一婦人榜掠誣服獄具德輝疑其寃  
其後果得盜趙秉文楊愷咸器其材金亡北渡史天  
澤開府真定辟為經歷官歲乙未從天澤南征籌畫  
調發多出德輝天澤將誅逃兵德輝救正配令穴城  
光州葦山農民為寨以自固天澤議攻之德輝請招  
之降全活甚眾歲丁未世祖在潛邸召見問曰孔子  
歿已久今其性安在對曰聖人與天地終始無往不  
在殿下能行聖人之道性即在是矣又問或云遼以



釋廢金以儒亡有諸對曰遼事臣未周知金季乃所  
親睹宰執中雖用一二儒臣餘皆武弁世爵及論軍  
國大事又不使預聞大抵以儒進者三十之一國之  
存亡自有任其責者儒何咎焉世祖然之因問德輝  
曰祖宗法度具在而未盡設施者甚多將如之何德  
輝指銀鑿喻曰創業之主如製此器精選白金良匠  
規而成之畀付后人傳之無窮當求謹厚者司掌乃  
求為寶用否則不惟缺壞亦恐有竊而去之者矣世  
祖良久曰此正吾心所不忘也又訪中國人材德輝  
舉魏璫元裕李冶等二十餘人又問農家作勞何衣

食之不贍德輝對曰農桑天下之本衣食之所從出  
者也男耕女織終歲勤苦擇其精者輸之官餘麤惡  
者將以仰事俯育而親民之吏復橫歛以盡之則民  
鮮有不凍餒者矣歲戊申春釋奠致胙於世祖世祖  
曰孔子廟食之禮何如對曰孔子為萬代王者師有  
國者尊之則嚴其廟貌脩其時祀其崇與否於聖人  
無所損益但以此見時君崇儒重道之意何如耳世  
祖曰今而後此禮勿廢世祖又問典兵與宰民者為  
害孰甚對曰軍無紀律縱使殘暴害固非輕若宰民  
者頭會箕歛以毒天下使祖宗之民如蹈水火一為害



尤甚世祖默然曰然則奈何對曰莫若更遣族人之  
賢如口溫不花者使掌兵權勳舊則如忽都虎者使  
主民政若此則天下均受賜矣是年夏德輝得告將  
還更薦白文舉鄭顯之趙元德李造之高鳴李槃李  
濤數人陛辭又陳先務七事敦孝友擇人才察下情  
貴兼聽親君子信賞罰節財用世祖以字呼之賜坐  
錫賚優渥有頃奉旨教胄子孛羅等壬子德輝與元  
裕北覲請世祖爲儒教大宗師世祖悅而受之因啓  
累朝有旨蠲儒戶兵賦乞令有司遵行從之仍命德  
輝提調真定學校世祖即位起德輝爲河東南北路  
宣撫使下車墜豪強黜賊吏均賦役著臺不遠數千  
里來見曰六十年不復見此太平官府矣戴之若神  
明西川帥紐鄰重取兵千餘人守吏畏其威莫敢申  
理隸鳳翔屯田者八百餘人屯罷兵不歸籍會僉防  
戍兵河中浮梁故有守卒不以充數悉條奏之帝可  
其請兵後孱民多依庇豪右及有以身傭藉衣食歲  
久掩爲家奴悉遣還之爲民二年考績爲十路最陞  
見帝勞之命䟽所急務條四事一曰嚴保舉以取人  
材二曰給俸祿以養廉能三曰易世官而遷都邑四  
曰正刑罰而勿屢赦帝嘉納焉遷東平路宣慰使春



早禱泰山而雨東平賦夥獄繁視河東相倍蓰凡遇  
賦奸悉窮之不少貸奏免遠輸豆粟二十萬斛和糶  
粟十萬斛實合丁議賦蠶絲令民稅而後輸德輝曰  
是誣上以毒下也且後期之責孰任之遂罷其事孀  
婦馬氏將鬻其女以代納逋賦分已俸代償之仍蠲  
其額至元三年秋參議中書省事五年春擢侍御史  
辭不拜有言沿邊將校冒代軍士虛糜廩幣者勅按  
之奏曰在昔將校脩嘗艱阻與士卒同甘苦今年少  
子弟襲爵或以微勞進用豈知軍旅之事乎致使朝  
廷遣使覆按此省院素失約束耳痛繩之則人不自

安第易其部署選武毅才畧者任之庶使軍政自新  
又時委司憲者体究庶革其弊有旨命德輝議御史  
臺條例德輝奏曰御史執法官今法令未明何據而  
行此事行之不易陛下宜慎思之有頃復召曰朕慮  
之熟矣卿當力行之對曰必欲行之乞立宗正府以  
正皇族外戚得以糾彈女謁毋令奏事諸局承應人  
皆得寃治帝良久曰其徐行之德輝請老命舉任風  
憲者疏烏古倫貞等二十人以聞初河東歉請於朝  
發常平貸之并減其秋租有差賦役不均官吏並緣  
為姦賦一征十年不勝其困苦民率流亡德輝閱實



戶編均其等第出納有法數十年之弊一旦革去德輝天資剛直博學有經濟器毅然不可犯望之知爲端人然性不喜嬉笑與元裕李治游封龍山時人號爲龍山三老云卒年八十

### 馬亨

馬亨字大用邢州南和人世業農以貨雄鄉里亨少孤事母孝金季習爲吏庚寅太宗始建十路徵收課稅使河北東西路使王晉辟亨爲掾以才幹稱甲午晉薦於中書令耶律楚材授轉運司知事尋陞經歷擢轉運司副使庚戌太保劉秉忠薦亨於世祖召見

潛邸甚器之旣而籍諸路戶口以亨副八春忙哥撫諭西京太原平陽及陝西五路俾民弗擾旣還圖山川形勢以獻餘使者多以賄敗惟亨等各賜衣九襲癸丑從世祖征雲南留亨爲京兆權課所長官京兆藩邸分地也亨以寬簡治之不事掎克凡五年民安而課裕丁巳憲宗遣阿藍荅兒等覈藩府錢穀亨時輦歲辦課銀五百錠輸之藩府道出平陽適與之遇亨策曰見之則銀必拘留不見則必以罪加我與其銀弗達王府寧獲罪焉避而過之阿藍荅兒果怒遣使逮之王府世祖詢亨曰汝往得無撻汝罪耶對曰



無害願一行乃慰遣亨既至拘係之窮治百端竟無所得惟以支竹課分例錢克公用及僦公廨輦運腳價爲不應勒償其直而已世祖知其誣更賜銀三十二錠己未從世祖攻鄂州洎北還遣亨馳驛往西京等處罷所僉軍并撫諭山西河東陝右漢中既還復遣轉餉江上軍實中統元年世祖即位陝西四川立宣撫司詔亨議陝西宣撫司事尋賜金符遷陝西四川規措軍儲轉運使時阿藍荅兒等叛亨與宣撫使廉希憲商擬合謀誅劉太平等悉定關輔尋建行省命亨兼陝西行省左右司郎中時興元畜糧五萬石

欲轉餉太安軍計傭直萬緡衆推亨往時丁內艱以攝省府事強起之至則以兵官丁產均其役不閱月而事集無勞民傷財之嘆興元判官費正質狡悍不法莫有能治之者亨白省府欲以法繩之反誣購行省前保關中有異謀詔右丞粘合珪讞之亨力辯之寃購釋然四年遷陝西五路西蜀四川廉訪都轉運使未幾朝廷以考課檄諸路轉運司至則併轉運司入總管府咸奪其制書授亨工部侍郎解鹽副使亨乃上言以考課定賞罰其人甫集而一切罷之則是非安在宜還其命書伸仕者有所勸勉從之亨復上



便宜六事一曰東宮保傅當用正人以固國本二曰中書大政擇任儒臣以立朝綱三曰任相惟賢官不必備今宰相至十七員宜加裁汰四曰左右郎署毗贊大政今用豪貴子弟豈能贊襄五曰六曹之職分理萬機今止設左右二部事何由辦六曰建元以來使民條畫已多有司徃徃視爲文具宜令憲司糾舉務在必行疏聞帝即召見有旨卿比安在胡不早言亨對曰新自陝西來覲帝諭曰卿久著忠勤自今不令卿遠出矣至元三年進嘉議大夫左三部尚書尋改戶部尚書金穀出納有條不紊時有賈胡恃制國

用使阿合馬欲買交鈔本私平準之利以增歲課爲辭帝以問亨對曰交鈔可以權萬貨者法使然也法者主上之柄今使一賈擅之廢法從私將何以今天下事遂寢耳又建言立常平義倉謂備荒之具宜亟舉行而時以財用不足止設義倉七年立尚書省仍以亨爲尚書領左部亨上言尚書省專領金穀百工之事其銓選宜歸中書以示無濫尋爲平章阿合馬所忌以誣免官會國兵圍襄樊廷議河南行省調發軍餉詔以阿里爲右丞姚樞爲左丞亨爲僉省任其事水陸供餽未嘗有闕亨之力爲多十年還京師帝

方欲柄用之遽嬰末疾十四年卒年七十一子紹庭  
雲南諸路肅政廉訪司副使

### 程思廉

程思廉字介甫其先洛陽人元魏時以豪右徙雲中  
遂家東勝州父恒國初佩金符爲沿邊監推規運使  
解州鹽使思廉用太保劉秉忠薦給事裕宗潛邸以  
謹愿聞命爲樞密院監印平章政事哈丹行省河南  
署爲都事丞相史天澤尤器之時方規取襄樊使任  
轉餉築城置倉以受粟轉輸者與民爭門不時至思  
廉令行者異路粟至多露積一夕大雨思廉安卧不

起省中召詰之思廉曰此去敵近中夜騷動衆必驚  
疑或致他變縱有漂濕不過軍中一日糧耳聞者疑  
之至元十二年調同知淇州徙東平路判官入爲監  
察御史以劾權臣阿合馬繫獄其黨巧爲機穽思廉  
居之泰然卒不能害累遷河北河南道按察副使道  
過彰德聞兩河歲饑而徵租益急欲止之有司謂法  
當上請思廉曰若然民已不堪命矣即移文罷徵後  
果得請二十年河北復大饑流民渡河求食朝廷遣  
使者集官屬絕河止之思廉曰民急就食豈得已哉  
天下一家河北河南皆吾民也亟令縱之且曰雖得



罪死不恨章上不之罪也衛輝懷孟大水思廉臨視  
賑貸全活甚衆水及城不沒者數板即脩隄防露宿  
督役水不為患衛人德之遷陝西漢中道按察使以  
母老不赴俄丁母憂二十六年立雲南行御史臺起  
復思廉為御史中丞始至蠻夷酋長來賀詞若遜而  
意甚倨思廉奉宣上意綏懷遠人且明示禍福使毋  
自外聞者懾服雲南舊有學校而禮教不興思廉力  
振起之始有從學問禮者成宗即位除河東山西廉  
訪使太原歲餉諸王駝馬一萬四千餘匹思廉為請  
止餉千匹平陽諸郡歲輸租稅於北方民甚苦之思  
廉為請得輸河東近倉舊法決事咸有議劄權歸曹  
吏思廉自判牘尾某當某罪吏皆束手思廉累任風  
憲剛正疾惡言事剴切如請早建儲貳訪求賢俊辨  
車服議封謚養軍力定律令皆急務也與人交有終  
始或有疾病死喪問遺賙卹往返數百里不憚勞仍  
為之經紀家事撫視其子孫其於家族尤盡恩意好  
薦達人物或者以為好名思廉曰若避好名之譏人  
不復敢為善矣卒年六十二謚敬肅

烏古孫澤

烏古孫澤字潤甫臨潢人其先女真烏古部因以為

氏祖壁仕金爲明威將軍資用庫使從金主遷汴汴  
城陷轉徙居大名父仲侗儻有奇節遭金季世憤無  
所施用高言危行親交避之遂縱酒陽狂以自晦然  
教澤特嚴澤性剛毅讀書舉大畧一切求諸已不事  
章句才幹過人世祖將取江南澤以選輸鈔至淮南  
餉軍丞相阿朮見而奇之補淮東大都督府掾至元  
十四年元帥唆都下兵閩越見澤與語而合即辟元  
帥府提控案牘時宋廣王據福州改元炎興度我軍  
且至遂入于海復聚兵甲子門其將張世傑攻泉州  
興化守臣陳瓚舉郡應之文天祥置都督府于南劍

州守臣張清行都督府事謀復建寧閩中郡縣徃徃  
復從宋江東大擾唆都時軍浙東建信告急唆都謀  
于衆曰我軍當何先澤曰彼據閩廣而我徃浙右非策  
之善譬之伐木務除其根當先向南會行省檄唆都與  
左丞塔出會兵甲子門遂度兵閩關八戰而至南劍  
殺其守臣張清宋師遂退冬十月收福州進攻興化  
拔之唆都怒其民反覆下令屠城澤屢諫不聽復前  
說曰世傑不虞我軍遽至方急攻泉州謀固其植我  
新得泉州民志未固旦暮且失守比我定興化整兵  
而南彼樹植將日固矣莫若開其遺民使走泉南扇



元史卷五十一  
張世傑傳卷五十一  
動之世傑將膽落而走是不戰而完泉州捷於吾  
兵之馳救也唆都喜開南門縱民去因得脫死者甚  
衆世傑得逃民知興化已破乃解泉州圍去唆都至  
泉州部署別將裝大艦趣甲子門自將下漳州軍于  
海豐引精騎與塔出會十二月入廣州十五年春正  
月還擊潮州守將馬發備禦甚固澤曰潮人所以城  
守不下者以外多壁壘爲之接應也第翦其外應潮  
必覆矣乃分兵攻其一大壘破之餘壘盡散走二旬  
而潮拔馬發死焉既而文天祥軍潰於江西廣王暨  
張世傑死于海中唆都還軍福建夏五月詔立行中

書省于福建以唆都行參知政事澤行省都事從朝  
京師命知興化軍賜金織衣賞其善謀也繼改興化  
軍爲路授澤行總管府事民歌舞迎候于道曰是吾  
民復生之父母也喜極而繼以泣郡新殘于兵白骨  
在野首下令掩埋之又衣食其流離之民有棄子于  
道者置慈幼曹籍而撫育之郡中惡年少喜爲不義  
以資求竄名卒伍異後得計功版授官吏恐激變不  
敢詰澤悉追毀所授誅其尤無良者貪暴始戢始陳  
瓚以郡應張世傑民多戰死者至是吏援例將籍其  
產澤語吏曰國家至仁誅止陳瓚從瓚者猶蒙宥民



奈何連坐亟爲令曰民不幸誅誤從陳瓚誅及鬪死無後者其田廬貲產並給其族姻有司無所與吏不能逆乃止當江南未定盜賊所在有之民自相什伍保衛鄉里及時平行省議籍爲兵上下洶洶澤白行省曰國兵非少今籍民以示少非所以安反側也且當籍者衆民或有他心議遂格澤又興學校召長老及諸生講肄經義行鄉飲酒禮旁郡聞而慕之興化故號多士士咸知嚮慕以澤與常袞方儀並肖像祠于學官至元二十一年調永州路判官湖廣平章政事要束木貪縱淫虐誅求無厭或妄言初歸附時州縣長吏及吏胥富人比屋斂銀將輸之官銀已具而事遂中止要束木即下令責民自實使者旁午隨地置獄株連蔓引備極慘酷民以考掠瘦死者載道所獲不貲要束木盡掩有之有使至永澤戒吏美供帳豐酒食務順適其意使者感愧無所發其毒因間以利害曉之一郡由是獲安是歲盜起寶慶武崗皆永旁郡也行省遣澤討平之俘獲五百餘人簡出其誑誤者百有五十人上書言狀誅其首惡者三十一人餘得減死二十六年丞相桑哥建議考校錢穀天下騷動澤嘆曰民不堪命矣即自上計行省要束木怒



元史列傳卷五十一  
三十一  
曰郡國錢糧無不增羨永州何爲獨不然此直孫府  
判倚其才辨慢我亟拘繫之非死不釋也明年桑哥  
敗要束木伏誅澤始得釋二十九年湖廣平章政事  
闊里吉思薦澤才堪將帥以行省員外郎從征海南  
黎黎人平軍還上功授廣南西道宣慰副使秋七月  
併左右兩道歸廣西宣慰司置元帥府澤爲廣西兩  
江道宣慰副使僉都元帥府事兩江荒遠瘴癘與百  
夷接不知禮法澤作司規三十有二章以漸爲教其  
民至今遵守之又省廩置二十二所以紓民力歲饑  
上言蠲其田租發象州賀州官粟三千五百石以賑

饑者既數乃上其事時行省平章哈剌哈孫察其心  
誠愛民不以專擅罪之邕管徼外蠻數爲寇澤循行  
並徼得院塞處布畫遠邇募民伉健者四千六百餘  
戶置雷留那扶十屯列營堡以守之陂水墾田築八  
塌以節渚洩得稻田若干畝歲收穀若干石爲軍儲  
邊民賴之海北元帥薛赤干賦利事覺行省檄澤驗  
治澤馳至雷州盡發其奸贓縱所掠男女四百八十  
二口牛數千頭金銀器物稱是海北之民欣忭相慶  
御史臺言烏古孫澤奉使知大體如汲長孺爲將計  
萬全如趙充國可屬大任詔擢爲海北海南廉訪使



故例圭田至秋乃入租後遂計月受之澤視事三月  
民輸租計米五百石澤曰夫子有言事君者先其事  
後其食吾泣政日淺而受祿四倍非情所安量食而  
入餘悉委學官給諸生以勸業常曰士非儉無以養  
廉非廉無以養德身一布袍數年妻子朴素無華人  
皆言之澤不以爲意也雷州地近海潮汐齧其東南  
陂塘黷農病焉而西北廣衍平袤宜爲陂塘澤行視  
城陰曰三溪徒走海而不以灌溉此史起所以薄西  
門豹也乃教民浚故湖築大堤塌三溪瀦之爲斗門  
七堤塌六以制其羸耗醜爲渠二十有四以達其注

輸渠皆支別爲牒設守視者時其啓閉計得良田數  
千頃瀕海廣瀉並爲膏土民歌之曰烏鹵爲田兮孫  
父之教渠之泱泱兮長我秔稻自今有年兮無旱無  
澇至大元年改福建廉訪使澤宿有德於閩閩人安  
之有芝五色產於憲司之澄清堂士民以爲澤之所  
致以母年踰八十求歸養長沙歲餘母喪澤以哀毀  
卒妻杜以夫死飲食不入口者十有三日不死乃復  
食澤積官自承直即至中大夫謚正憲子良禎仕至  
中書右丞以功名終

趙炳



趙炳字彥明惠州灤陽人父弘有勇略國初爲征行  
兵馬都元帥積階奉國上將軍炳幼失怙恃鞠於從  
兄歲饑往平州就食遇盜欲殺之兄解衣就縛炳年  
十二泣請代兄盜驚異舍之而去甫弱冠以勲闕之  
子侍世祖於潛邸恪勤不怠遂蒙眷遇世祖次桓撫  
間以炳爲撫州長城邑規制爲之一新己未王師伐  
宋未幾北方有警括兵斂財燕薊騷動王師北還炳  
遠迓中途具以事聞追所括兵及橫斂財物悉歸於  
民世祖嘉其忠中統元年命判北京宣撫司事北京  
控制遼東番夷雜處號稱難治時參知政事楊果爲

宣撫使聞炳至喜曰吾屬無憂矣三年括北京鷹坊  
等戶丁爲兵蠲其賦令炳總之時李璫叛據濟南炳  
請討之國兵圍城炳將千人獨當北面有所俘獲即  
縱遣去曰脅從之徒不足治也濟南平入爲刑部侍郎  
兼中書省斷事官時有携妓登龍舟者即按之以法  
未幾其人死其子犯蹕訴寃詔讓之炳曰臣執法尊  
君職當爲也帝怒命之出旣而謂侍臣曰炳用法太  
峻然非循情者改樞密院斷事官濟南妖民作亂賜  
金虎符加昭勇太將軍濟南路總管炳至止罪首惡  
餘黨解散歲凶發廩賑民而後以聞朝廷不之罪也



遷遼東提刑按察使遼東聞其來豪猾屏跡至元九年帝念關中重地風俗强悍思得剛鯁舊臣以臨之授炳京北路總管兼府尹皇子安西王開府於秦詔治宮室悉聽炳裁製王府吏卒橫暴擾民者即建白繩以法王命之曰後有犯者勿復啓請若自處之自是豪猾斂戢秦民以安有旨以解州鹽賦給王府經費歲久積逋二十餘萬緡有司追理僅獲三之一民已不堪炳密啓王曰十年之逋責償一日其孰能堪與其哀斂病民孰若惠澤加於民乎王善其言遽命免徵會王北伐詔以京兆一年之賦充軍資炳復請

曰所徵逋課足佐軍用可貸歲賦以蘇民力令下秦民大悅十四年加鎮國上將軍安西王相王府冬居京兆夏徙六盤山歲以爲常王旣北伐六盤守者搆亂炳自京兆率兵往捕甫及再旬元惡授首十五年春六盤再亂復討平之王還自北嘉賞戰功賚賜有加是歲十一月王薨十六年秋被旨入見便殿帝勞之曰卿去數載衰白若此關中事煩可知已詢及民間利病炳悉陳之因言王薨之後運使郭琮郎中郭叔雲竊弄威柄恣爲不法帝卧聽遽起曰開卿斯言使老者增健飲以上尊馬湏改中奉大夫安西王相



無陝西五路西蜀四川課程屯田事餘職如故即令  
乘傳偕勅使數人往按琮等至則琮假嗣王旨入炳  
罪收炳妻孥囚之時嗣王之六盤徙炳等於平涼比  
崆峒山囚閉益嚴炳子仁榮訴於上即詔近侍二人  
馳駟而西脫炳且械琮黨偕來琮等留使者醉以酒  
先遣人毒炳於平涼獄中其夜星隕有聲如雷年五  
十九實十七年三月也帝聞之撫髀嘆曰失我良臣  
俄械琮等百餘人至帝親鞫問盡得其情既各伏辜  
命仁榮手刃琮叔雲於東城籍其家以付仁榮仁榮  
曰不其戴天之人所蓄之物皆取於民何忍受之帝

善之別賜鈔二萬二千五百緡為治喪具國朝舊制  
無賻臣下禮蓋殊恩也六月詔雪炳寃特贈中書左  
丞謚忠愍子六人仁顯早亡次仁表仁榮仁旭仁舉  
仁軌仁榮仕至中書平章政事餘俱登顯仕

列傳卷第五十

列傳卷第五十一

元史一百六十四

翰林學士中書左丞相制誥兼翰林待制承直郎知制誥兼國史院編修官程榮

楊恭懿

楊恭懿字元甫奉元人。力學強記，日數千言。雖從親  
逃亂，未常廢業。年十七西還，家貧服勞，為養暇則就  
學。書無不讀，尤深於易。禮、春秋後，得朱熹集註四書  
歎曰：人倫日用之常，天道性命之妙，皆萃此書矣。父  
沒，水漿不入口者五日。居喪盡禮，宣撫司行省以掌  
書記辟不就。至元七年，與許衡俱被召，恭懿不至。衡



拜中書左丞日於右相安童前稱譽恭懿之賢丞相以聞十年詔遣使召之以疾不起十一年太子下教中書俾如漢惠聘四皓者以聘恭懿丞相遣郎中張元智為書致命乃至京師既入見世祖遣國王和童勞其遠來繼又親詢其鄉里族氏師承子姓無不周悉十二年正月二日帝御香殿以大軍南征使久不至命筮之其言秘侍讀學士徒單公履請設取士科詔與恭懿議之恭懿言明詔有謂士不治經學孔孟之道目為賦詩空文斯言誠萬世治安之本今欲取士宜勅有司舉有行檢通經史之士使無投牒自售試以經義論策夫既從事實學則士風還淳民俗趨厚國家得才矣奏入帝善之會北征恭懿遂歸田里十六年詔安西王相敦遣赴闕入見詔於太史院改曆十七年二月進奏曰臣等徧考自漢以來曆書四十餘家精思推筭舊儀難用而新者未備故日行盈縮月行遲疾五行周天其詳皆未精察今權以新儀木表與舊儀所測相較得今歲冬至晷景及日躔所在與列舍分度之差大都北極之高下晝夜刻長短叅以古制創立新法推筭成辛巳曆雖或未精然比之前改曆者附會元曆更日立法全踵故習顧亦無



愧然必每歲測驗修改積三十年庶盡其法可使如  
三代日官世專其職測驗良久無改歲之事矣又合  
朔議曰日行歷四時一周謂之一歲月踰一周復與  
日合謂之一月言一月之始日月相合故謂合朔自  
秦廢曆紀漢太初止用平朔法大小相間或有二大  
者故日食多在晦日或二日測驗時刻亦鮮中宋何  
承天測驗四十餘年進元嘉曆始以月行遲速定小  
餘以正朔望使食必在朔名定朔法有三大二小時  
以異舊法罷之梁虞翻造大同曆隋劉焯造皇極曆  
皆用定朔爲時所阻唐傅仁均造戊寅曆定朔始得

行貞觀十九年四月類大人皆異之竟改從平朔李  
淳風造麟德曆雖不用平朔遇四大則避人言以平  
朔間之又希合當世爲進朔法使無元日之食至一  
行造大衍曆謂天事誠密四大二小何傷誠爲確論  
然亦循常不改臣等更造新曆一依前賢定論推算  
皆改從實今十九年曆自八月後四月併大實日月  
合朔之數也詳見郭守敬傳是日方列跪未讀奏帝  
命許衡及恭懿起曰卿二老母自勞也授集賢學士  
兼太史院事十八年辭歸二十年以太子賓客召二  
十二年以昭文館學士領太史院事各二十九年以



議中書省事召皆不行三十一年卒年七十

王恂

王恂字敬甫中山唐縣人父良金末為中山府掾時民遭亂後多以註誤繫獄良前後所活數百人已而棄去吏業潛心伊洛之學及天文律曆無不精究年九十二卒恂性穎悟生三歲家人示以書帙輒識風丁二字母劉氏授以千字文再過日即成誦六歲就學十三學九數輒造其極歲己酉六保劉秉忠北上途經中山見而竒之及南還從秉忠學於磁之紫金山癸丑秉忠薦之世祖召見于六盤山命輔導裕宗

為太子伴讀中統二年擢太子贊善時年二十八三年裕宗封燕王守中書令兼判樞密院事敕兩府大臣凡有咨稟必令王恂與聞初中書左丞許衡集唐虞以來嘉言善政為書以進世祖嘗令恂講解且命太子受業焉又詔恂於太子起居飲食慎為調護非所宜接之人勿令得侍左右恂言太子天下本付託至重當延名德與之居處况兼領中書樞密之政詔條所當徧覽庶務亦當屢省官吏以罪免者毋使更進軍官害人改用之際尤不可非其人民至愚而神變亂之餘吾不之疑則反覆化為忠厚帝深然之恂



早以算術名裕宗嘗問焉恂曰算數六藝之一定國家安人民乃大事也每侍左右必發明三綱五常爲學之道及歷代治忽興亡之所以然又以遼金之事近接耳目者區別其善惡論著其得失上之裕宗問以心之所守恂曰許衡嘗言人心如印板惟板本不差則雖摹千萬紙皆不差本既差則摹之於紙無不差者裕宗深然之詔擇勲戚子弟使學於恂師道卓然及恂從裕宗撫軍稱海乃以諸生屬之許衡及衡告老而去復命恂領國子祭酒國學之制實始於此帝以國朝承用金大明曆歲久浸䟽欲釐正之知恂

精於算術遂以命之恂薦許衡能明曆之理詔驛召赴闕命領改曆事官屬悉聽恂辟置恂與衡及楊恭懿郭守敬等徧考曆書四十餘家晝夜測驗創立新法參以古制推算極爲精密詳在守敬傳十六年授嘉議大夫太史令十七年曆成賜名授時曆以其年冬頒行天下十八年居父喪哀毀日飲勺水帝遣內侍慰諭之未幾卒年四十七初恂病裕宗屢遣醫診治及葬賻鈔二千貫後帝思定曆之功以鈔五千貫賜其家延祐二年贈推忠守正功臣光祿大夫司徒上柱國定國公謚文肅子寬賓並從許衡游得星曆



之傳於家學裕宗嘗召見語之曰汝父起於書生貧  
無貲蓄今賜汝鈔五千貫用盡可復以聞恩恤之厚  
如此寬由保章正歷兵部郎中知蠡州賓由保章副  
累遷秘書監

郭守敬

郭守敬字若思順德邢臺人生有異操不為嬉戲事  
大父榮通五經精於筭數水利時劉秉忠張文謙張  
易王恂同學於州西紫金山榮使守敬從秉忠學中  
統三年文謙薦守敬習水利巧思絕人世祖召見面  
陳水利六事其一中都舊漕河東至通州引玉泉水

以通舟歲可省雇車錢六萬緡通州以南於藺榆河  
口徑直開引由蒙村跳梁務至楊村還河以避浮雞  
洶盤淺風浪遠轉之患其二順德達泉引入城中分  
為三渠灌城東地其三順德澧河東至古任城失其  
故道沒民田千三百餘頃此水開修成河其田即可  
耕種自小王村徑滹沱合入御河通行舟楫其四磁  
州東北滏漳二水合流處引水由滏陽邯鄲洺州永  
年下經雞澤合入澧河可灌田三千餘頃其五懷孟  
沁河雖澆灌猶有漏堰餘水東與丹河餘水相合引  
東流至武陟縣北合入御河可灌田二千餘頃其六



黃河自孟州西開引少分一渠經由新舊孟州中間  
順河古岸下至溫縣南復入大河其間亦可灌田二  
千餘頃每奏一事世祖歎曰任事者如此人不為素  
餐矣授提舉諸路河渠四年加授銀符副河渠使至  
元元年從張文謙行省西夏先是古渠在中興者一  
名唐來其長四百里一名漢延長二百五十里它州  
正渠十皆長二百里支渠大小六十八灌田九萬餘  
頃兵亂以來廢壞淤淺守敬更立牘堰皆復其舊二  
年授都水少監守敬言舟自中興沿河四晝夜至東  
勝可通漕運及見查泊兀郎海古渠甚多宜加修理

又言金時自燕京之西麻峪村分引盧溝一支東流  
穿西山而出是謂金口其水自金口以東燕京以北  
灌田若干頃其利不可勝計兵興以來與守者懼有  
所失因以大石塞之今若按視故蹟使水得通流上  
可以致西山之利下可以廣京畿之漕又言當於金  
口西預開減水口西南還大河令其深廣以防漲水  
突入之患帝善之十二年丞相伯顏南征議立水站  
命守敬行視河北山東可通舟者為圖奏之初秉忠  
以大明曆自遼金承用二百餘年浸以後天議欲修  
正而卒十三年江左既平帝思用其言遂以守敬與



王恂率南北日官分掌測驗推步於下而命文謙與  
樞密張易爲之主領裁奏於上左丞許衡參預其事  
守敬首言曆之本在於測驗而測驗之器莫先儀表  
今司天渾儀宋皇祐中汴京所造不與此處天度相  
符比量南北二極約差四度表石年深亦復歎側守  
敬乃盡考其失而移置之既又別圖高爽地以木爲  
重棚創作簡儀高表用相比覆又以爲天樞附極而  
動昔人嘗展管望之未得其的作候極儀極辰既位  
天體斯正作渾天象象雖形似莫適所用作玲瓏儀  
以表之矩方測天之正圓莫若以圓求圓作仰儀古

有經緯結而不動守敬易之作立運儀日有中道月  
有九行守敬一之作證理儀表高景虛罔象非真作  
景符月雖有明察景則難作闕几曆法之驗在於交  
會作日月食儀天有赤道輪以當之兩極低昂標以  
指之作星晷定時儀又作正方案九表懸正儀座正  
儀爲四方行測者所用又作仰規覆矩圖異方渾蓋  
圖日出入永短圖與上諸儀互相參攷十六年改局  
爲太史院以恂爲太史令守敬爲同知太史院事給  
印章立官府及奏進儀表式守敬當帝前指陳理致  
至於日晏帝不爲倦守敬因奏唐一行開元間令南



宮說天下測景書中見者九十三處今疆宇比唐尤  
大若不遠方測驗日月交食分數時刻不同晝夜長  
短不同日月星辰去天高下不同即日測驗人少可  
先南北立表取直測景帝可其奏遂設監候官一十  
四員分道而出東至高麗西極滇池南踰朱崖北盡  
鐵勒四海測驗凡二十七所十七年新曆告成守敬  
與諸臣同上奏曰臣等竊聞帝王之事莫重於曆自  
黃帝迎日推策帝堯以閏月定四時成歲舜在璇璣  
玉衡以齊七政爰及三代曆無定法周秦之間閏餘  
乖次西漢造三統曆百二十年而後是非始定東漢

造四分曆七十餘年而儀式方備又百二十一年劉  
洪造乾象曆始悟月行有遲速又百八十年姜岌造  
三紀甲子曆始悟以月食衝檢日宿度所在又五十  
七年何承天造元嘉曆始悟以朔望及弦皆定大小  
餘又六十五年祖冲之造大明曆始悟太陽有歲差  
之數極星去不動處一度餘又五十二年張子信始  
悟日月交道有表裏五星有遲疾留逆又三十三年  
劉焯造皇極曆始悟日行有盈縮又三十五年傅仁  
均造戊寅元曆頗采舊儀始用定制又四十六年李  
淳風造麟德曆以古曆章部元首分度不齊始為總



法用進朔以避晦晨月見又六十三年一行造大衍曆始以朔有西大三小定九服交食之異又九十四年徐昂造宣明曆始悟日食有氣刻時三差又百三十六年姚舜輔造紀元曆始悟食甚之餘差數以上計千一百八十二年曆經七十改其創法者十有三家自是又百七十四年聖朝專命臣等改治新曆臣等用創造簡儀高表憑其測實數所考正者凡七事一曰冬至自丙子年立冬後依每日測到晷景逐日取對冬至前後日差同者為準得丁丑年冬至在戊戌日夜半後八刻半又定丁丑夏至在庚子日夜半後七十刻又定戊寅冬至在癸卯日夜半後三十三刻己卯冬至在戊申日夜半後五十七刻庚辰冬至在癸丑日夜半後八十一刻各減大明曆十八刻遠近相符前後應準二曰歲餘自大明曆以來凡測景驗氣得冬至時刻真數者有六用以相距各得其時合用歲餘今考驗四年相符不差仍自宋大明壬寅年距至今日八百一十年每歲合得三百六十五日二十四刻二十五分其二十五分為今曆歲餘合用之數三曰日躔用至元丁丑四月癸酉望月食既推求日躔得冬至日躔赤道箕宿十度黃道箕九度有

求日躔得冬至日躔赤道箕宿十度黃道箕九度有



竒仍憑每日測到太陽躔度或憑星測月或憑月測日或徑憑星度測日立術推筭起自丁丑正月至己卯十二月凡三年共得一百三十四事皆躔於箕與日食相符四曰月離自丁丑以來至今憑每日測到逐時太陰行度推筭變從黃道求入轉極遲疾并平行屢前後凡十三轉計五十一事內除去不真的外有三十事得大明曆入轉後天又因考驗交食加大明曆三十刻與天道合五曰入交自丁丑五月以來憑每日測到太陰去極度數比擬黃道去極度得月道交於黃道共得八事仍依日食法度推求皆有食

分得入交時刻與大明曆所差不多六曰二十八宿距度自漢太初曆以來距度不同互有損益大明曆則於度下餘分附以太半少皆私意牽就未嘗實測其數今新儀皆細刻周天度分每度為三十六分以距線代管窺宿度餘分並依實測不以私意牽就七曰日出入晝夜刻太明曆日出入晝夜刻皆據汴京為準其刻數與大都不同今更以本方址極出地高下黃道出入內外度立術推求每日日出入晝夜刻得夏至極長日出寅正二刻日入戌初二刻晝六十二刻夜三十八刻冬至極短日出辰初二刻日入申



正二刻晝三十八刻夜六十二刻永為定式所創法  
凡五事一曰太陽盈縮用四正定氣立為升降限依  
立招差求得每日行分初末極差積度比古為密二  
曰月行遲疾古曆皆用二十八限今以萬分日之八  
百二十分為一限凡析為三百三十六限依堦疊招  
差求得轉分進退其遲疾度數逐時不同蓋前所未  
有三曰黃赤道差舊法以一百一度相減相乘今依  
筭術句股弧矢方圓斜直所容求到度率積差差率  
與天道實脗合四曰黃赤道內外度據累年實測內  
外極度二十三度九十分以圓容方直矢接句股為

法求每日去極與所測相符五曰白道交周舊法黃  
道變推白道以斜求斜今用立渾比量得月與赤道  
正交距春秋二正黃赤道正交一十四度六十六分  
擬以為法推逐月每交二十八宿度分於理為盡十  
九年倘卒時曆雖頽然其推步之式與夫立成之數  
尚皆未有定藁守敬於是比次篇類整齊分秒裁為  
推步七卷立成二卷曆議擬藁三卷轉神選擇二卷  
上中下三曆注式十二卷二十三年繼為太史令遂  
上表奏進又有時候箋注二卷修改源流一卷其測  
驗書有儀象法式二卷二至晷景考二十卷五星細



行考五十卷古今交食考一卷新測二十八舍雜坐  
諸星入宿去極一卷新測無名諸星一卷月離考一  
卷並歲之官二十八年有言灤河自永平挽舟踰山  
而上可至開平有言瀘溝自麻峪可至尋麻林朝廷  
遣守敬相視灤河既不可行瀘溝舟亦不通守敬因  
陳水利十有一事其一大都運糧河不用一畝泉舊  
原別引北山白浮泉水西折而南經瓮山泊自西水  
門入城環匯於積水潭復東折而南出南水門合入  
舊運糧河每十里置一牐比至通州凡為牐七距牐  
里許上重置斗門互為提閘以過舟止水帝覽奏喜

曰當速行之於是復置都水監俾守敬領之帝命丞  
相以下皆親操畚鍤倡工待守敬指授而後行事先  
是通州至大都陸運官糧歲若干萬石方秋霖雨驢  
畜死者不可勝計至是皆罷之三十年帝還自上都  
過積水潭見舳舻激水大悅名曰通惠河賜守敬鈔  
萬二千五百貫仍以舊職兼提調通惠河漕運事守  
敬又言於澄清牐稍東引水與北渠河接且立牐麗  
正門西令舟楫得環城往來志不就而罷三十一年  
拜昭文館大學士知太史院事大德二年召守敬至  
上都議開鐵幡竿渠守敬奏山水頻年暴下非大為



渠堰廣五七十步不可執政吝於工費以其言爲過縮其廣三之一明年大雨山水注下渠不能容漂沒人畜廬帳幾犯行殿成宗謂宰臣曰郭太史神人也惜其言不用耳七年詔內外官年及七十並聽致仕獨守敬不許其請自是翰林太史司天官不致仕定著爲令延祐三年卒年八十六

楊桓

楊桓字武子兗州人幼警悟讀論語至宰予晝寢章慨然有立志由是終身非疾病未嘗晝寢弱冠爲郡諸生一時名公咸稱譽之中統四年補濟州教授後

由濟寧路教授召爲太史院校書郎奉敕撰儀表銘曆日序文辭典雅賜楮幣千五百緡辭不受遷祕書監丞至元三十一年拜監察御史有得玉璽於木華黎曾孫碩德家者桓辨識其文曰受天之命既壽永昌乃頓首言曰此歷代傳國璽也亡之久矣今宮車晏駕皇太孫龍飛而璽復出天其彰瑞應於今日乎即爲文述璽始末奉上于徽仁裕聖皇后成宗即位桓疏上時務二十一事一曰郊祀天地二曰親享太廟備四時之祭三曰先定首相四曰朝見羣臣訪問時政得失五曰詔儒臣以時侍講六曰設太學及府



州儒學教養生徒七曰行誥命以褒善叙勞八曰異  
章服以別貴賤九曰正禮儀以肅宮庭十曰定官制  
以省內外冗員十一曰講究錢穀以裕國用十二曰  
訪求曉習音律者以協太常雅樂十三曰國子監不  
可隸集賢院宜正其名十四曰試補六部寺監及府  
州司縣吏十五曰增內外官吏俸祿十六曰禁父子  
骨肉奴婢相告訐者十七曰定婚姻聘財十八曰罷  
行用官錢營什一之利十九曰復笞杖以別輕重之  
罪二十曰郡縣吏自中統前仕官者宜加優異二十  
一曰為治之道宜各從本俗疏奏帝嘉納之未幾陞  
秘書少監預修大一統志秩滿歸兗州以貨業悉讓  
弟楷鄉里稱焉大德三年以國子司業召未赴卒年  
六十六桓為人寬厚事親篤孝博覽羣籍尤精篆籀  
之學著六書統六書泝源書學正韻大抵推明許慎  
之說而意加深皆行于世

### 楊果

楊果字正卿祁州蒲陰人幼失怙恃自宋遷亳復徙  
居許昌以章句授徒為業流寓轅軻十餘年金正大  
甲申登進士第會叅政李蹊行大司農於許果以詩  
送之蹊大稱賞歸言於朝用為偃師令到官以廉幹



元史列傳卷五十一 十五  
稱改蒲城改陝皆劇縣也果有應變材能治煩劇諸  
縣以果治效爲最金亡歲己丑楊奐徵河南課稅起  
果爲經歷未幾史天澤經略河南果爲叅議時兵革  
之餘法度草創果隨宜贊畫民賴以安世祖中統元  
年設十道宣撫使命果爲北京宣撫使明年拜叅知  
政事及例罷猶詔與左丞姚樞等日赴省議事至元  
六年出爲懷孟路總管大修學廟以前嘗爲中書執  
政官移文申部特不署名以老致政卒于家年七十  
五謚文獻果性聰敏美風姿工文章尤長於樂府外  
若沈默內懷智用善諧譏聞者絕倒微時避亂河南  
娶羈旅中女後登科歷顯仕竟與偕老不易其初心  
人以是稱之有西菴集行於世

王構

王構字肯堂東平人父公淵遭金末之亂其兄三人  
挈家南奔公淵獨誓死守墳墓伏草莽中諸兄呼之  
不出號慟而去卒得存其家而三兄不知所終構少  
穎悟風度凝厚學問該博文章典雅弱冠以詞賦中  
選爲東平行臺掌書記叅政賈居貞一見器重俾其  
子受學焉至元十一年授翰林國史院編脩官時遣  
丞相伯顏伐宋先下詔讓之命構屬草以進世祖大



元史列傳卷五十一  
悅宋亡構與李槃同被旨至杭取三館圖籍太常天  
章禮器儀仗歸于京師凡所薦拔皆時之名士十三  
年秋還入覲遷應奉翰林文字陞修撰丞相和禮霍  
孫由翰林學士承旨拜司徒辟構爲司直時丞相阿  
合馬爲盜擊死世祖亦悟其姦復相和禮霍孫更張  
庶務構之謀畫居多歷吏部禮部郎中審囚河南多  
所平反改太常少卿定親享太廟儀注擢淮東提刑  
按察副使召見便殿親授制書賜上尊酒以遣之尋  
以治書侍御史召屬桑哥爲相俾與平章卜忽木檢  
覈燕南錢穀而督其逋負以十一月晦行期歲終復  
命明年春還宿盧溝驛度逾期禍且不測謂卜忽木  
曰設有罪構當以身任之不以累公也會桑哥死乃  
免有旨出銓選江西入翰林爲侍講學士世祖崩構  
撰謚冊成宗立由侍講爲學士纂修實錄書成叅議  
中書省事時南士有陳利便請搜括田賦者執政欲  
從之構與平章何榮祖共言其不可辨之甚力得不  
行以疾歸東平久之起爲濟南路總管諸王從者怙  
勢行州縣民莫敢忤視構聞諸朝徙之北境學田爲  
牧地所侵者理而歸之官貸民粟歲飢而責償不已  
構請輸以明年武宗即位以纂修國史趣召赴闕拜



翰林學士承旨未幾以疾卒年六十三構歷事三朝  
練習臺閣典故凡祖宗謚冊冊文皆所撰定朝廷每  
有大議必咨訪焉喜薦引寒士前後省臺翰苑所辟  
無慮數十人後居清要皆有名于時子士熙仕至中  
書叅政卒官南臺御史中丞士點淮西廉訪司僉事  
皆能以文學世其家

魏初

魏初字大初弘州順聖人從祖璠金貞祐三年進士  
補尚書省令史金宣宗求直言璠首論將相非人及  
不當立德陵事疏奏不報後復上言國勢危逼四方

未聞有勤王之舉隴右地險食足其帥完顏胡斜虎  
亦可委仗宜遣人往論大計大臣不悅而止閱數月  
胡斜虎兵來援已無及金主悔焉金將武仙軍次五  
梁山不進求使仙者或薦璠即授朝列大夫翰林修  
撰給騎四人以從至則仙已遁去部曲亦多散亡璠  
撫循招集得數千人推其中材勇者為帥長仍制符  
印予之以矯制自効金主謂其處置得宜繼聞仙率  
餘眾保留山璠直趣仙所宣諭之或讒於仙謂璠欲  
奪其軍仙怒命士拔刃若欲鏖璠然且引一吏與璠  
辨璠不為動大言曰王人雖微序于諸侯之上將軍



元史列傳卷五十一 六  
縱不加禮奈何聽讒邪之言欲以小吏置對耶且將軍跳山谷而左右無異心者以天子大臣故也苟不知尊天子安知麾下無如將軍者不然吾有死無辱命仙不能屈璠復激使進兵不應比還金主已遷歸德復遷蔡州金亡璠無所歸乃北還鄉里庚戌歲世祖居潛邸聞璠名徵至和林訪以當世之務璠條陳便宜三十餘事舉名士六十餘人以對世祖嘉納後多采用焉以疾卒于和林年七十賜謚靖肅初其從孫也璠無子以初爲後初好讀書尤長於春秋爲文簡而有法比冠有聲中統元年始立中書省辟爲掾

史兼掌書記未幾以祖母老辭歸隱居教授會詔左丞許衡學士竇默及京師諸儒各陳經史所載前代帝王嘉言善政選進讀之士有司以初應詔帝雅重璠名方之古直詢知初爲璠子歎獎久之即授國史院編修官尋拜監察御史首言法者持天下之具御史臺則守法之司也方今法有未定百司無所持循宜參酌考定頒行天下帝宴群臣於上都行宮有不能醕大卮者免其冠服初上疏曰臣聞君猶天也臣猶地也尊卑之禮不可不肅方今內有太常有史官有起居注以議典禮記言動外有高麗安南使者入



貢以觀中國之儀昨聞錫宴大臣威儀弗謹非所以  
尊朝廷正上下也疏入帝欣納之仍諭侍臣自今毋  
復爲此舉時襄樊未下將括民爲兵或請自大興始  
初言京師天下之本要在殷盛建邦之初詎宜搔動  
遂免括大興兵初又言舊制常參官諸州刺史上任  
三日舉一人自代况風紀之職與常員異請自今監  
察御史按察司官在任一歲各舉一人自代所舉不  
當有罰不惟砥礪風節亦可爲國得人遂舉勸農副  
使劉宣自代出僉陝西四川按察司事歷陝西河東  
按察副使入爲治書侍御史又以侍御史行御史臺  
事于揚州擢江西按察使尋徵拜侍御史行臺移達  
康出爲中丞卒年六十一子必復集賢侍講學士

### 焦養直

焦養直字無咎東昌堂邑人夙有才器稱至元十八  
年世祖改符寶郎爲典瑞監思得一儒者居之近臣  
有以養直薦者帝即命召見數對稱旨以真定路儒  
學教授超拜典瑞少監二十四年從征乃顏二十八  
年賜宅一區入侍帷幄陳說古先帝王政治帝聽之  
每忘倦嘗語及漢高帝起自側微誦所舊聞養直從  
容論辨帝即開納由是不薄高帝大德元年成宗幸



元史列傳卷五十一  
柳林命養直進講資治通鑑因陳規諫之言詔賜酒  
及鈔萬七千五百貫二年賜金帶象笏三年遷集賢  
侍講學士賜通犀帶七年詔傳太子於宮中成沃誠  
至帝聞之大悅八年代祀南海九年進集賢學士十  
一年陞太子諭德至大元年授集賢大學士謀議大  
政悉與焉告老歸而卒贈資德大夫河南等處行中  
書省右丞謚文靖子德方以廕爲興國路總管府判  
官

孟攀鱗

孟攀鱗字駕之雲內人曾祖彥甫以明法爲西北路  
招討司知事有疑獄當死者百餘人彥甫執不從後  
三日得實皆釋之祖鶴父澤民皆金進士攀鱗幼日  
誦萬言能綴文時號奇童金正大七年擢進士第仕  
至朝散大夫招討使歲壬辰汴京下北歸居平陽丙  
午爲陝西帥府詳議官遂家長安世祖中統三年授  
翰林待制同修國史至元初召見條陳七十事大抵  
勸上以郊祀天地祠太廟制禮樂建學校行科舉擇  
守令以字民儲米粟以贍軍省無名之賦罷不急之  
役百司庶府統於六部紀綱制度悉由中書是爲長  
久之計世祖悉嘉納之咨問諄諄後論王百一許仲



平優劣對曰百一文華之士可置翰苑仲平明經傳道可爲後學矜式帝深然之又嘗召問宗廟郊祀儀制攀鱗悉據經典以對時帝將親祀詔命攀鱗會太常議定禮儀攀龍夜畫郊祀及宗廟圖以進帝皆親覽焉復以病請西歸帝令就議陝西五路四川行中書省事四年卒年六十四延祐三年贈翰林學士承旨資德大夫上護軍平原郡公謚文定

尚野

尚野字文蔚其先保定人徙滿城野幼穎異祖母劉厚資之使就學至元十八年以處士徵爲國史院編

修官二十年兼興文署丞出爲汝州判官廉介有爲憲司屢薦之二十八年遷南陽縣尹初至官獄訟充斥野裁決無留滯涉旬遂無事改懷孟河渠副使會遣使問民疾苦野建言水利有成法宜隸有司不宜復置河渠官事聞于朝河渠官遂罷大德六年遷國子助教諸生入宿衛者歲從幸上都丞相哈剌哈孫始命野分學於上都以教諸生仍鑄印給之上都分學自野始俄陞國子博士誨人先經學而後文藝每謂諸生曰學未有得徒事華藻若持錢買水所取有限能自鑿井及泉而汲之不可勝用矣時學舍未備



野密請御史臺乞出帑藏所積大建學會以廣教育仁宗在東宮野為太子文學多所裨益時從賓客姚燧諭德蕭輿入見帝為加禮至大元年除國子司業近臣奏分國學西序為大都路學帝已可其奏野謂國學府學混居不合禮制事遂寢四年拜翰林直學士知制誥同修國史詔野赴吏部試用廕補官野多所優假或病其太寬野曰今初設此法異將來者習詩書知禮義耳非必責效目前也衆乃服皇慶元年陞翰林侍講學士延祐元年改集賢侍講學士兼國子祭酒二年夏移疾歸滿城四方來學者益衆六年

卒于家年七十六贈通奉大夫太常禮儀院使護軍追封上黨郡公謚文懿野性開敏志趣正大事繼母以孝聞文辭典雅一本於理子師易蘄州路總管府判官師簡中奉大夫奎章閣侍書學士同知經筵事

### 李之紹

李之紹字伯宗東平平陰人自幼穎悟聰敏從東平李謙學家貧教授鄉里學者咸集至元三十一年纂修世祖實錄徵名儒充史職以馬紹李謙薦授將仕佐郎翰林國史院編修官直學士姚燧欲試其才凡翰林應酬之文積十餘事併以付之之紹援筆立成



併以藁進燧驚喜曰可謂名下無虛士也大德二年  
聞祖母疾辭歸復除編修官陞將仕郎六年陞應奉  
翰林文字七年遷太常博士九年丁母憂累起復終  
不能奪至大三年仍授太常博士階承事郎四年陞  
承直郎翰林待制皇慶元年遷國子司業延祐三年  
陞奉政大夫國子祭酒夙夜孳孳惟以教育人材為  
心四年十二月陞朝列大夫同僉太常禮儀院事六  
年改翰林直學士復以疾還七年召為翰林直學士  
至治二年陞翰林侍講學士知制誥同修國史三年  
告老而歸泰定三年八月卒年七十三子勗蔭父職  
同知諸暨州事之紹平日自以其性遇事優游少斷  
故號果齋以自勵有文集藏于家



列傳卷第五十二

元史一百五十五

翰學喜泰知制誥兼修國史廉翰待制承直學士知制誥兼國史院修撰喜德等奉勅修

張禧

張禧東安州人父仁義金末徙家益都及太宗下山東仁義乃走信安時燕薊已下獨信安猶為金守其主將知仁義勇而有謀用之左右國兵圍信安仁義率敢死士三百開門出戰圍解以功署軍馬總管守信安踰十年度不能支乃與主將舉城內附率其部曲從宗王合丑平定河南授管軍元帥後攻歸德飛



矢入口折其二齒鏃出項後卒賜爵縣侯禧年十六從大將阿木魯南攻徐州歸德復從元帥察罕攻壽春安豐廬滁黃泗諸州皆有功禧素峭直爲主將所忌誣以他罪欲寘之法時王鶚侍世祖於潛邸禧密往依之鶚請左丞闊闕薦禧與其子弘綱俱入見歲已未從世祖南伐濟江與宋兵始接戰即擒其一將進攻鄂州諸軍穴城以入宋樹柵爲夾城於內入戰者輒不利乃命以厚賞募敢死士禧與子弘綱俱應募由城東南入戰將至城下帝憫其父子俱入險地遣阿里海牙諭禧父子上一人進戰禧所執槍中弩

矢而折取弘綱槍以入破城東南角有逗留不進者十餘人立城下弘綱復奪其槍入轉戰良久禧身中十八矢一矢鏃貫腹悶絕復甦曰得血竭飲之血出可生世祖亟命取血竭遣人往療之瘡既愈復從大將納剌忽與宋兵戰于金口李家洲皆捷世祖即位賜金符授新軍千戶三年從征李璫時宋乘璫叛遣夏貴襲取蘄縣宿州等城禧移兵攻之貴走盡復諸城至元元年陞唐鄧等州盧氏保甲丁壯軍總管宋侵均州總管李王山敗走帝命禧代之三年與宋將呂文煥戰于高頭赤山乘勝復均州四年改水軍總



管益其軍二千五百令習水戰五年從攻襄樊六年七月夏貴率兵援襄陽禧從元帥阿朮戰却之八年江水暴溢宋遣范文虎以戰艦千餘艘來援元帥阿朮命禧率輕舟夜衝枚入其陣中插葦以識水之深淺及還阿朮即命禧率四翼水軍進戰宋兵潰追至淺水奪戰艦七十餘艘九年攻樊城焚其串樓敗宋將張貴于鹿門山十年行省集諸將問破襄陽之策禧言襄樊夾漢江而城敵人橫鐵鎖置木檣于水中今斷鎖毀檣以絕其援則樊城必下樊城下則襄陽可圖矣行省用其計乃破樊城而襄陽繼降帝遣使

錄諸將功授宣武將軍水軍萬戶佩金虎符丞相伯顏因命禧為水軍先鋒十二年敗宋將孫虎臣于丁家洲尋移屯黃池以斷宋救兵九月從阿朮與宋都統姜才戰有功加信武將軍十三年從下溫台福建十四年加懷遠大將軍江陰路達魯花赤水軍萬戶十六年入朝進昭勇大將軍招討使十七年加鎮國上將軍都元帥時朝廷議征日本禧請行即日拜行中書省平章政事與右丞范文虎左丞李庭同率舟師泛海東征至日本禧即捨舟築壘平湖島約束戰艦各相去五十步止泊以避風濤觸擊八月颶風大



作文虎庭戰艦悉壞禧所部獨完文虎等議還禧曰  
士卒溺死者半其脫死者皆壯士也曷若乘其無回  
顧心因擢於敵以進戰文虎等不從曰還朝問罪我  
輩當之公不與也禧乃分船與之時平湖島屯兵四  
千乏舟禧曰我安忍棄之遂悉棄舟中所有馬七十  
疋以濟其還至京師文虎等皆獲罪禧獨免子弘綱  
弘綱字憲臣年十八父禧為主將所誣繫獄將殺之  
弘綱直入獄中獄卒併繫之弘綱佯狂謔笑守者易  
之既寢遂與其父逸去後從其父攻城徇地屢有功  
自昭信校尉管軍總把佩銀符換金符爲千戶陞總

管廣威將軍招討副使加定遠大將軍招討使襲鎮  
江陰盜起安吉弘綱率兵往捕未踰旬擒之從叅政  
高興破建德溪寨諸賊後賜三珠虎符授昭勇大將  
軍河南諸翼征行萬戶從右丞劉滂征八百媳婦國  
師次八畚與叛蠻宋隆濟等力戰而歿贈宣忠秉義  
功臣資善大夫湖廣等處行中書省左丞上護軍追  
封齊郡公謚武宣子漢當襲職讓其弟鼎漢後爲監  
察御史累官至集賢直學士鼎襲江陰水軍萬戶

賈文備

賈文備字仲武祁州蒲陰人父輔仕金爲祁州刺史



武仙憚輔膽畧密今所親圖之輔以衆歸太祖詔隸  
張柔以兵攻蠡州慶都安平束鹿諸縣皆下之柔開  
帥府於滿城命輔行元帥府事於祁州從定山東遷  
左副元帥柔將兵在外輔常居守累功改行軍千戶  
賜金符尋領順天河南等路軍民萬戶卒文備襲父  
千戶職張柔命屯三汊口備宋兵宋以雲梯二十餘  
來攻文備率兵鏖戰却之憲宗賜弓矢銀盃歲乙卯  
復令襲父左副元帥職兼領順天路中統三年升開  
元府路女真水達達等處宣撫使佩金虎符三年遷  
開元東京懿州等處宣慰使四年改授萬戶領張柔

所部軍屯亳州宋兵時鈔掠淮甸文備戰却之至元  
二年加昭勇大將軍真定路總管兼府尹六年調衛  
輝路總管七年授西蜀成都統軍以疾不赴八年授  
宿州萬戶尋改河南等路統軍圍襄樊九年移蔡州  
兼水陸漕運宋兵時掠糧餉文備敗之併奪其船詔  
罷統軍文備入覲賜弓矢金鞍錦衣白金十一年復  
授萬戶漢軍都元帥領劉整軍駐亳州宋將夏貴知  
毫無備盛引兵來襲文備出奇邀擊大破之帝賜金  
鞍金織文段白金丞相伯顏伐宋文備領左翼諸軍  
以從抵郢州宋築二城夾江布戰艦數千艘于江中



陳兵兩岸軍不得進文備泛舟由淪河徑出大江攻  
 武磯堡乃從阿木先渡江大軍繼之遂取鄂漢以功  
 賜白金加昭毅大將軍守鄂州十二年從平章政事  
 阿里海牙趣湖南至潭州城下文備冒鋒鏑砲傷右  
 手流矢中左臂攻戰愈急宋臣李芾死之轉運判官  
 鍾蜚英等以城降十三年加昭武大將軍守潭州十  
 四年衡永郴等郡寇發文備悉討平之十五年進鎮  
 國上將軍湖南道宣慰使徇瓊崖等州及廣東瀕海  
 諸城追宋衛王昺十六年召還拜淮東宣慰使加金  
 吾上將軍鎮慶元十八年復授都元帥二十年改江

東宣慰使討建寧盜黃華二十二年拜荆湖占城行  
 中書省叅知政事二十三年改湖廣行省叅知政事  
 二十四年致仕後十七年以疾卒延祐四年贈江西  
 等處行中書省左丞追封武威郡公謚莊武

鮮誠

鮮誠易州定興人善水戰從伐宋設方畧奪敵船千  
 計以功授金符水軍萬戶兼都水監使焦湖之戰獲  
 戰艦三百艘宋以舟師來援誠據舟厲聲呵之援兵  
 不敢動急移舟抵岸乘勢追殺之奪其軍餉三百餘  
 斛既又從攻安豐壽復泗亳諸州俱有功又從下雲



南大理國以功賜金虎符從攻鄂奪敵艦千餘艘殺溺敵軍甚衆世祖嘉其功嘗降制獎之至元三十年卒贈推忠宣力功臣龍虎衛上將軍同知樞密院事上護軍追封易國公謚武定子汝楫襲從討李壇平宋累獲功賞卒贈推忠效節功臣資德大夫中書右丞上護軍追封易國公謚忠毅子帖哥襲從征廣西下靜江府改授水軍招討使尋復爲萬戶從征交趾有功陞廣東道宣慰使卒贈資德大夫河南江北等處行中書省左丞上護軍平陽郡公謚武宣子世英由監察御史遷山南江北道僉事

管如德

管如德黃州黃陂縣人父景模爲宋將以蘄州降授淮西宣撫使如德爲江州都統制至元十二年亦以城降先是如德嘗被俘虜思其父與同輩七人間道南馳爲邏者所獲械送于郡如德伺邏者怠即引械擊死數十人各破械脫走間關萬里達父所景模喜曰此真吾兒也至是入覲世祖笑曰是孝於父者必忠於我矣一日授以強弓二如德以左手兼握右手悉引滿之帝曰得無傷汝臂乎後母復然嘗從獵遇大溝馬不可越如德即解衣浮渡帝壯之由是稱爲



元史列傳卷五十一  
拔都賞賚優渥帝問我何以得天下宋何以亡如德對曰陛下以福德勝之襄樊宋咽喉也咽喉被塞不亡何待帝曰善帝又命習國書曰習成當為朕言之一日帝語如德曰朕治天下重惜人命凡有罪者必令面對再四果實也而後罪之非如宋權姦擅權書片紙數字即殺人也汝但一心奉職毋懼忌嫉之口授湖北招討使總管本部軍馬佩金虎符是年六月丞相阿朮南攻宋如德以軍為前鋒至揚州楊子橋與宋戰晝夜不息如德先登陷陣擒其帥張都統等宋軍遂潰七月進軍佳山江上復大戰奪宋帥夏都

統牌印衣甲及餉軍海船悉送阿朮所事聞帝命賞之軍至鎮江如德招安諸郡守將皆望風降附丞相伯顏取臨安復選能招諸郡者眾推如德如德銜命往諭紹興諸郡皆下初世祖以寶刀賜如德及與敵戰刀刃盡缺宋平入覲如德以刀上呈曰陛下向所賜刀從軍以來刀缺如是矣帝嘉其朴十二年遷浙西宣慰使上時政五條一曰立額薄征二曰息兵懷遠三曰立法用人四曰省役恤民五曰設官制祿時法制未備仕多冗員又方用兵日本倭國而軍民之官廩祿未有定制故如德言及之權臣抑不得上二



年丞相阿塔海命馳驛奏出征事入見世祖問曰江南之民得無有二心乎如德對曰往歲旱澇相仍民不聊生今累歲豐稔民沐聖恩多矣敢有貳志使果有貳志臣曷敢飾辭以欺陛下乎帝善其言且喻之曰阿塔海有未及者卿善輔導之有當奏聞者卿勿憚勞宜馳捷足之馬來告於朕二十四年遷江西行省叅知政事破豪猾去茲吏居民大悅是時贛汀二州盜起如德指揮諸將討平之其脅從者多所全宥二十六年遷江西行尚書省左丞時鍾明亮以循州叛殺掠州縣千里丘墟帝命如德統四省兵討之諸將欲直搗其巢穴如德曰嘻今田野之氓疲於轉輸介胄之士病於暴露重困斯民而自爲功吾不爲也於是遣使喻以禍福賊感如德誠信即擁十餘騎詣贛州石城縣降平章政事奧魯赤怒其跋扈不臣欲以事殺明亮如德聞之曰皇元仁厚未嘗殺降明亮叛人何足惜所重者信不可失耳年四十有四卒于軍贈江西行省左丞平昌郡公謚武襄子九淳祖積官中順太夫龍興路富州尹

### 趙匣刺

趙匣刺者始以父任爲千戶佩金符中統三年守東



川四年宋夏貴以兵侵虎嘯山寨元帥欽察遣匣刺率兵往禦之貴敗走追至新明縣斬首三十餘級宋劉雄飛以兵犯青居山舊府匣刺與戰於都尉壩敗之斬首二十餘級欽察攻釣魚山遣匣刺以兵千五百人畧地至南壩擊敗宋軍生獲軍士五十七人老幼三百四十人從攻大良平宋督萬壽運糧至渠江之鵝灘匣刺邀擊之斬首五十餘級宋兵大敗匣刺亦被三創矢鏃中左肩不得出欽察惜其驍勇取死囚二人剖其肩視骨節淺深知可出即為鑿其創拔鏃出之匣刺神色不為動至元三年為東川路先鋒

使四年元帥拜答攻開州至萬寶山遣匣刺以兵五百人擊宋軍生獲四十人五年兼管京兆延安兩路新軍戍東安虎嘯山兩城宋楊立以兵護糧送大良平匣刺察知之遂率所部兵與立戰於三重山斬首百五十級擒獲四十餘人立敗走棄其糧千餘石因盡奪其甲仗旗幟而還六年行院遣匣刺攻釣魚山之沙市焚其敵樓從左丞曲力吉思等入朝詔賞白金五十兩細甲一注九年統軍合刺攻釣魚山時匣刺為先鋒領兵千人畧地至葛樹坪與宋兵遇生獲二十餘人斬首四十級十年三月復從行院合答攻



釣魚山之沙市匣刺乘夜蟻附而登殺其守兵燒其積聚生獲二十餘人以歸又擊敗宋將張珏兵於武勝軍行院新拔禮義山砦命匣刺守之十二年率舟師會攻釣魚山戰數有功進圍重慶宋將趙安勸兵出戰匣刺迎擊之夜至二鼓敵衆大潰行院以其功上聞未報而疾作乃遣往瀘州治疾至之夕瀘州復叛匣刺輿疾出戰遂爲其所獲與從者二十人皆死之子世顯船橋副萬戶

周全

周全其先汝寧光州人仕宋爲武翼大夫廣南西路

馬步軍副總管至元十二年丞相伯顏總兵下江南全率衆來歸遂以行省檄遙授衡州知州是年秋七月入覲賜金符授明威將軍遙授泉州知州兼管軍千戶冬十月從元帥宋都解下江西諸城邑明年進兵福建宋制置使黃萬石降冬十月從大軍征廣東十一月至韶州城下嚴攻具率勇士先登與宋兵合戰斬馘甚衆殺其安撫使熊飛十二月以遊騎巡廣中過靈星海石門敵勢甚張全奮戈殺敵乘勝奪其旗鼓火其船及諸軍下廣州全功居多十四年從攻廣西靜江府宋安撫李夔龍率衆來降其有負固不



下者悉戰敗之奪敵艦以千計殺敵溺死者無筭兩廣以平第功賜虎符授管軍總管十五年盜據贛州崖石山寨全率兵討平之焚其寨十七年進廣威將軍管軍副萬戶鎮守龍興二十年以疾去官大德九年卒贈懷遠大將軍南安寨兵萬戶府萬戶輕車都尉追封汝南郡侯子祖瑞襲職

### 孔元

孔元字彥亨真定人驍勇有智畧歲丁酉棄家從軍隸丞相史天澤麾下戊戌從取焦湖圍壽春先登拔其西堡己亥從征安豐力戰却敵己酉從圍泗州拔

之辛亥從攻五堂山寨俘其衆以歸戊午從攻樊城親王塔察兒命取樊西堡元率死士挺槍大呼擊殺數百人斬首十九級以獻中統元年扈駕北征二年宣授管軍總把至元十一年從伐宋爲前鋒所向克捷十四年進武畧將軍管軍千戶明年還軍北征進武義將軍侍衛親軍千戶賜佩金符又明年國兵討叛王失里木等從行院別乞里迷失追其衆至兀速洋而還分軍之半扼其要害地餘衆遂潰獲輜重牛馬帝大悅賞賚甚厚加宣武將軍右衛親軍總管十九年以疾卒子鷹揚襲授昭信校尉右衛親軍弩軍



千戶仍佩金符至大元年以疾卒子成祖襲延祐二年卒子那海襲

### 朱國寶

朱國寶其先徐州人後徙寶坻父存器歷官至修內司使嘗夜行盧溝橋獲金一囊坐而待其主以付之其人請中分存器笑而遣之憲宗將攻宋募兵習水戰國寶以職官子從軍隸水軍萬戶解誠麾下己未世祖以兵攻鄂國寶攝千戶率銳卒於中流與宋師鏖戰凡十七戰諸軍畢濟中統二年授千戶佩銀符三年圍李璫於濟南佩金符鎮戍海東從征襄陽攝

四翼鎮撫督造戰艦築萬山堡至元十一年拔沙洋隲新城皆與有力焉初師次江上國寶請於丞相伯顏願當前鋒既而奪船二十艘以獻伯顏壯之宋據上流方舟數百結為堡柵伯顏指示曰復能奪取是乎國寶即奮往破柵既渡江下鄂漢十二年進兵臨岳州與宋兵戰於岳之桃花灘獲其將高世傑進昭信校尉管軍總管既降湖右加宣武將軍統蒙古諸軍鎮常德府知安撫司事時宋諸郡邑多堅守不下國寶傳檄招諭踰月悉平惟辰沅靖鎮遠未下宋將李信李穀結武岡洞蠻分據扼寨國寶擊敗之其衆



退保飛山新城思播蠻來援國寶復與戰破之擒張  
星沈舉等三百餘人進攻新城獲信發等獻俘江陵  
行省奏功賜金虎符十四年會諸道兵攻廣西靜江  
拔之進秩管軍萬戶鎮守梧州領安撫司事十五年  
加懷遠大將軍初宋臨安之破也張世傑挾二王由  
閩蹈海衆復滋蔓時南恩新州何華張翼舉兵興復  
軍勢甚盛國寶選精銳擊殺華翼擒其黨二人斬首  
萬餘級俘五百餘人船七百艘奪其兵器無算降其  
將十餘軍士二百民三萬餘戶十六年遷定遠大將  
軍海北海南道宣慰使蠻賊連結鬱林廉州諸洞恣

行剽掠國寶悉平之磔尸高化以懲反側任龍光等  
率所部五千戶降移瓊州立官程更弊政訓兵息民  
具有條制南寧謝有奎負固不服國寶開示信義有  
奎感悟以其屬來歸於是黎民降者三千戶蠻洞降  
者三十所十八年破臨高蠻寇五百人招降居亥番  
毫銅鼓博吐桐油等十九洞遣部將韓旺率兵畧大  
黎密塘橫山誅首惡李實火其巢生致大鍾小鍾諸  
部長十有八人加鎮國上將軍海北海南道宣慰使  
都元帥供給占城軍餉事集而民不擾二十三年遷  
廣南西道宣慰使二十四年入覲帝慰勞之二十五



年進輔國上將軍都元帥叅知政事行尚書省事以  
軍事至賴州得疾卒子傳舍年五十九子斌襲職累  
官加賜金虎符海北海南宣慰使都元帥斌上副萬  
戶佩金虎符鎮福州次鼎次鉉

張立

張立秦安長清人初隸嚴實麾下畧江淮有功署為  
百戶歲戊午憲宗征蜀徵諸道兵立從行次大獲山  
宋人阻山為城帶江為池恃以自固立統銳卒攻陷  
外堡奪戰船百餘艘復從攻釣魚山有功賜金帛中  
統初從世祖北征還授管軍總把賜銀符進侍衛軍

鎮撫換金符改侍衛軍千戶尋遷左衛親軍副都指  
揮使賜金虎符十四年春率步卒千人轉粟赴和林  
道出應昌會酋帥畔換謀不軌以射士三千踵其後  
欲乘間奪其資糧立覺其有異急命環車為柵以備  
之賊眾已合矢如雨下初立之設上都也每車載二  
板以備不虞至是建板于車矢不能入騎卒稍前即  
以戈撞之強弩繼發賊不得近相持連日乃解去是  
歲增置前後衛兵進明威將軍後衛親軍都指揮使  
賜雙珠虎符加昭勇大將軍以老乞退子珪襲珪卒  
子伯潛襲



齊秉節

齊秉節字子度濱州蒲臺人父珪從嚴實攻歸德廬州有功授無棣縣尹攝征行千戶後兼總管鎮棗陽中統三年李璫以益都叛徵諸道兵進討棗陽精銳盡行僅留羸卒千餘珪時攝萬戶府事與宋襄郢對壘敵來覘虛實珪城守周密以東門外壕狹小可越命浚之爲備宋將聶都統陳總管果率兵萬餘抵城東門以板渡壕壕廣板不能及珪率衆力戰敵退走城賴以完事聞賜金符直授千戶至元三年告老舉秉節自代秉節魁偉沈毅涉獵書史稍知兵法襲父

爵仍鎮棗陽五年從伐宋築新城白河口堡鹿門山畧地郢州大洪山黃仙洞數著戰功七年陞上千戶權萬戶十一年從丞相伯顏至郢盪舟由陸入江攻武磯堡擒宋將閻都統十二年國兵敗宋賈似道孫虎臣舟師于丁家洲命秉節屯建康與宋將趙淮戰于西離山追至溧陽自辰及午宋軍乃退八月遷武義將軍十二月從定太平安慶諸郡與宋將張咨議戰于崑山殺之十四年授宣武將軍管軍總管時黃州復叛令秉節往討斬余總轄于陣十七年授明威將軍二十三年移鎮饒州安仁劇賊蔡福一叛秉節



與有司會兵討之擒福一餘黨悉平二十五年陞廣  
威將軍棗陽萬戶府副萬戶二十八年卒年六十二  
子英襲

### 張萬家奴

張萬家奴父札古帶事睿宗於潛邸從破金有功賜  
虎符授河東南北路船橋隨路兵馬都總管萬戶從  
西征下興元圍嘉定歿于軍萬家奴數從都元帥大  
荅火魯征討有功中統二年從都元帥紐璘入朝授  
以父官宋兵入成都從行院阿脫擊破之至元四年  
帥師會立眉簡二州從也速荅兒攻瀘州大敗宋軍

殺傷過半俘四十餘人以歸七年率諸軍城張廣平  
與宋人戰斬首三百餘級獲都統一人從攻重慶破  
朝陽寨圍嘉定柵平康太和懷遠諸寨分兵以守之  
且日出師水陸接戰功居多而諸將攻瀘州往往失  
利乃詣闕請自任以攻取之效許之遂率舟師百五  
十艘自桃竹灘至折魚灘分守江面謹風火嚴號令  
約日進攻先據神臂門爲梯衝登城殺二百餘人斬  
關而入遂拔之加昭勇大將軍會圍重慶將其衆斷  
馬湖江分兵水陸往來爲游徼加昭毅大將軍以所  
部轉餉城都及下流諸屯尋遷招討使與都元帥藥



刺海討亦奚不薛蠻平之進副都元帥詔其子孝忠  
爲船橋萬戶以萬家奴將四川湖南兵征哈刺章時  
雲南惡昌多興羅羅諸蠻皆叛殺掠使者劫奪人民  
州郡莫能制遂以其兵討之勦其衆民爲之立祠二  
十年從征緬戰死之雲南王命其子保童將其軍從  
征入太公城有功襲副都元帥又從征至甘州山丹  
亦戰死孝忠少從父軍中好攻戰至元十九年從都  
元帥也速答兒討亦奚不薛蠻遇其衆于會靈關追  
至沙谿敗之進攻龍家寨阿那關克之遂攻亦奚不  
薛營大破之又以八百人敗阿永蠻於鹿札河乘勝  
至打鼓寨連破之諸蠻平以功賜金帛弓矢鞍轡還  
軍成都二十二年從討烏蒙蠻復擊降大坭都掌蠻  
子諸蠻加明威將軍二十七年詔從西征至沙瓜諸  
州還賜虎符僉書四川等處行樞密院事院罷以本  
軍萬戶鎮成都卒

郭昂

郭昂字彥高彰德林州人習刀槊能挽強稍通經史  
尤工於詩至元二年上書言事平章廉希憲材之授  
山東統軍司知事尋改經歷遷襄陽總軍司轉沅州  
安撫司同知佩金符招降溪洞八十餘柵播州張華



聚眾容山昂率兵屠之山徃木猫土獠諸洞盡降十  
六年以諸洞酋入朝帝賜金綺衣鞍轡進安遠大將  
軍徇沅州西南界復新化安仁二縣擒劇賊張虎縱  
之曰汝非吾敵願降即來不然吾復擒汝不難也明  
日虎降併其眾三千餘人悉使歸民籍軍還眾歛白  
金以獻一無所受行至江陵眾復從致金而去昂悉  
上之行省宰臣令藏於庫以示諸將二十六年江西  
盜起昂討之進逼南安明揚上龍巖湖綠村石門鴈  
湖赤水黑風峒諸蠻立太平寨而還會大飢以賊首  
家資分賑之授萬戶賜金虎符鎮撫州未幾省檄昂  
赴廣東監造戰船行至廣東界遇盜移檄諭以禍福  
廣東素服其威信及見其檄即俱降授廣東宣慰使  
卒年六十一子震杭州路鎮守萬戶惠僉江西廉訪  
司事豫知寧都州

綦公直

綦公直益都樂安人世業農至元五年為益都勸農  
官九年為沂莒膠密寧海五州都城池所千戶十年  
賜金符命造征日本戰船于高麗時宋未下世祖知  
其勇遣使召見俾與平不烈拔都等領兵同行荆南  
等處招討司事抵峽州青草灘霖雨不進還屯玉泉



山率兵三千攻安進下寨破之殺宋軍百餘人獲牛馬七百還至襄陽樞密院命督造戰艦運舟襄陽既下奉旨領鄧州光化唐州漢軍及郢復熟券軍九千二百人從諸軍南伐二十年冬至隆興宋軍突出城門逆戰公直敗之追抵城下遂踰壕拔木焚其樓櫓斬首萬餘級生擒七百人隆興降由是南安吉顛皆望風款附平堡柵六百餘所公直又令第三子忙古台攻梅關破淮德山寨入廣東至南海皆下之詔授公直武毅將軍管軍上千戶召入加昭勇大將軍管軍萬戶佩金虎符領侍衛親軍時伯延伯荅罕禿忽

魯叛于西夏命公直率軍討平之十八年五月陞輔國上將軍都元帥宣慰使鎮別十八里初帝詔以長子泰襲萬戶公直自陳父年老乞以泰爲樂安縣尹就養其父制可仍終身勿徙他職至是乃以忙古台襲萬戶佩金虎符從之鎮公直陞辭曰臣父喪五年願葬以行帝許之至家葬事畢遂計樂安稅課及貧民逋負悉以賜金代輸之乃行二十三年諸王海都叛侵別十八里公直從丞相伯顏進戰於洪水山敗之追擊浸遠援兵不至第五子瑗力戰而死公直與妻及忙古台俱陷焉二十四年忙古台奔還授定遠



夫將軍中侍衛親軍副都指揮使改湖州砲手軍匠  
萬戶討衢州山賊有功加昭勇大將軍泰後終於知  
寧海州

楊賽因不花

楊賽因不花初名漢英字熙載賽因不花賜名也其  
先太原人唐季南詔陷播州有楊端者以應募起竟  
復播州遂使領之五代以來世襲其職五傳至昭無  
子以族子貴遷嗣又八傳至粲粲生价价生文文生  
邦憲皆仕宋為播州安撫使至元十三年宋亡世祖  
詔諭之邦憲奉版籍內附授龍虎衛上將軍紹慶珍

州南平等處沿邊宣慰使播州安撫使卒年四十三  
贈推忠效順功臣平章政事追封播國公謚惠敏漢  
英邦憲子也生五歲而父卒二十二年母田氏携至  
上京見世祖於大安殿帝呼至御榻前熟視其眸子  
撫其頂者久之乃諭宰臣曰楊氏母子孤寡萬里來  
庭朕甚憫之遂命襲父職錫金虎符因賜名賽因不  
花及陞辭詔中書錫宴賜金幣綵繒賚其從者有差  
二十五年再入覲時年十二帝見其應對明敏稱善  
者三復因宰臣奏安邊事帝益嘉之是年改安撫司  
為宣撫司授宣撫使尋陞侍衛親軍都指揮使成宗



元史列傳卷三十一  
九  
即位賽因不花兩入見贈謚二代大德五年宋隆濟  
及折節等叛詔湖廣行省平章劉二拔都指揮使也  
先忽都魯率兵偕賽因不花討之六年秋九月師出  
播境連與賊遇破之前駐蹉泥賊騎猝至賽因不花  
奮擊先進大軍繼之賊遂潰乘勝逐北殺獲不可勝  
計遂降阿苴下笮籠望塵送款者相繼七年正月進  
屯暮窩賊衆復合又與戰于墨特川大破之折節懼  
乞降斬之又擒斬隆濟等西南夷悉平八年賽因不  
花復入見進資德大夫至大四年加勲上護軍詔許  
世襲播南盧崩蠻內侵詔賽因不花暨恩州宣慰使  
田茂忠率兵討之以疾卒於軍年四十贈推誠秉義  
功臣銀青榮祿大夫平章政事柱國追封播國公謚  
忠宣子嘉貞嗣

鮮卑仲吉

鮮卑仲吉中山人歲乙亥國兵定中原仲吉首率平  
灤路軍民詣軍門降太祖命爲灤州節度使從阿朮  
魯南征充右副元帥攻取信安關州諸城以功賜虎  
符授河北等路漢軍兵馬都元帥歲壬辰平蔡有功  
加金吾衛上將軍興平路都元帥右監軍永安軍節  
度使兼灤州管內觀察使提舉常平倉事開國侯尋



卒子準充管軍千戶從札台火兒赤東征高麗中統元年賜金符扈駕征阿里不哥以功受上賞三年從征李璫至元十年授侍衛親軍千戶昭武大將軍大都屯田萬戶佩虎符卒子誠襲授宣武將軍高郵上萬戶府副萬戶佩虎符改授懷遠大將軍僉武衛親軍都指揮使司事領兵征爪哇攻八百媳婦國使廣東克勤于役尋以疾卒子忽篤土襲

### 完顏石柱

完顏石柱祖德住仕金為管軍千戶父拿住歸太祖從征西域河西又從太宗攻下鳳翔同州有功賜號

八都兒佩銀符為同州管民達魯花赤改賜金符兼征行千戶總管八都軍憲宗以拿住年老命石柱襲其職己未石柱從世祖征合剌章還都元帥紐璘攻馬湖江石柱奪浮橋與宋兵戰有功賞白金七百五十兩軍龍化縣與宋兵戰大敗之中統二年授征行萬戶佩金符三年從都元帥帖哥攻嘉定有功改賜金虎符至元四年敗宋兵于九頂山生獲四十餘人五年攻瀘州之水寨擊五獲寨渡馬湖江迎擊宋兵敗之從行省也速帶兒攻建都建都降從攻嘉定復瀘州取重慶石柱之功居多十四年遷招勇大將軍



十六年授四川東道宣慰使十七年改鎮國上將軍  
四川西道宣慰使總管隨路八都萬戶二十年拜四  
川行省叅知政事卒弟直童襲為隨路八都萬戶

列傳卷第五十二

列傳卷第五十三

元史一百五十六

以翰林學士審察制誥兼國史編修官臣王禕等奉  
勅修

王禕

王禕高麗王暉之猶子也美容儀慷慨有志略善騎  
射讀書通大義以質子入朝歲癸丑高麗權臣高令  
公叛憲宗命耶虎大王東征禕奉旨為使講和仍鎮  
守其地時高麗人戶新附者就命禕總之中統元年  
授金符總管陞佩虎符兼領軍民三年率兵征濟南  
李壇至元七年高麗臣林衍叛世祖遣頭輦哥國王



討之縛簽領部民一千三百戶與國王同行是年十一月以疾辭還家居二十年九月卒壽六十一子三人阿剌帖木兒襲職授虎符總管高麗入戶至元八年將兵討叛賊金通精賊敗走耽羅十一年進昭勇大將軍從都元帥忽都征日本國預有戰功五年加鎮國上將軍安撫使高麗軍民總管尋陞輔國上將軍東征左副都元帥十八年復征日本遇風濤遂沒于軍闕帖木兒入侍武宗潛邸積勞授太中大夫管民總管兀愛嚴兄阿剌帖木兒職佩金虎符授安遠大將軍安撫使高麗軍民總管東征左副都元帥二十

四年乃顏叛力戰屢捷復從月魯兒那演討塔不歹朵歡大王于蒙可山那江統兵五千餘衆與八剌哈赤脫歡相拒絕沅戰黑龍江箭中右臂忍傷復戰敵大敗二十五年征哈丹禿魯隸平章闊里帖木兒麾下論功居多冬十二月賊軍古都禿魯干次于斡魯禿塞平章率兀愛討降之明年加授昭武大將軍遼陽等處行中書省事又明年哈丹等入寇高麗國境遣兀愛鎮守仍修城壁嚴卒伍軍威大振賊遂潛遁九月哈丹禿魯干復寇纏春兀愛引兵擊却之二十八年入覲世祖于內殿嘉其戰功賜尚方玉帶及銀酒器



二十九年改東征左副都元帥府立總管高麗女直  
漢軍萬戶府乃授兀愛三珠虎符陞鎮國上將軍總  
管高麗女直漢軍萬戶府燕濟陽安撫使高麗軍民  
總管

### 隋世昌

隋世昌其先登州棲霞人父寶徙居萊陽金末隸軍  
伍主帥奇其貌以爲管軍謀克俄授懷遠大將軍管  
軍都總領鎮行村海口太宗丁山東寶遂來歸授萊  
陽令歷萊州節度判官終高密令世昌其弟四子也  
涉獵書史善騎射身長八尺銀渾鐵爲鎗重四十餘

斤能左右擊刺歲癸丑選充隊長宋兵來攻海州世  
昌戰却之壬戌克東海世昌先登陞馬軍隊官己未  
攻連水城世昌樹雲梯攀緣而上身被數鎗衆從之  
遂克其城陞馬軍千戶中統元年宋將夏貴軍淮南  
新城世昌夜乘艤舫抵城下宋兵出戰斬首數百級  
刺殺其守將二人未幾連水復叛歸宋世昌軍于東  
馬寨城外宋兵來攻世昌擊走之三年改步軍千戶  
還鎮行村海口至元元年朝議分揀正軍奧魯授萊  
陽縣諸軍奧魯長官六年伐宋七年以世昌爲淄萊  
萬戶府副都鎮撫守萬山堡建言修一字城以圍襄



樊陞管軍千戶九年敗宋兵于鹿門山元帥劉整築  
新門使世昌總其役樊城出兵來爭且拒且築不終  
夜而就整授軍二百令世昌立礮簾於樊城欄馬墻  
外夜大雪城中矢石如雨軍校多死傷達旦而礮簾  
立宋人列艦江上世昌乘風縱火燒其船百餘樊城  
出兵鏖戰欄馬墻下世昌流血滿甲勇氣愈壯而樊  
城竟破襄陽亦下遷武略將軍引兵由黃澗堡入漢  
江破沙洋攻新城世昌坎其城而先登中數矢傷臂  
髡鬚皆裂昏眩墜地少蘇復進遂下新城明日丞相  
伯顏視所坎城高一丈五尺餘論功爲上從諸軍渡

江抵南岸宋兵聯舟來拒世昌舍舟師率蒙古哈必  
赤軍步戰斬其將一人宋師潰世昌追之復與戰大  
敗之十二年從戰于丁家洲以功陞管軍千戶佩金  
符十三年圍揚州世昌絕其糧道兼搜湖泊宋兵聞  
鐵鎗名不敢近揚州平充四城兵馬使從平章阿木  
入見授宣武將軍管軍總管十四年戍揚州擊野人  
原司空山等七寨皆下之進安撫使佩金虎符鎮澈  
浦十七年拜定遠大將軍管軍萬戶尋以獲海賊功  
進階安遠大將軍二十三年改沂郟上副萬戶世昌  
前後數百戰體皆金瘡竟以是疾卒年六十一封定



海郡侯謚忠勇子國英嗣

羅璧

羅璧字仲玉鎮江人父大義爲宋將璧年十三而孤長從朱禩孫入蜀累官武翼大夫利州西路馬步軍副揔管禩孫移荆湖璧從之至江陵右丞阿里海牙領軍下江陵璧從禩孫降授宣武將軍管軍千戶隸丞相阿朮麾下招收淮軍討歙寇有功領本州安撫事至元五年從元帥張弘範定廣南賜金符陞明威將軍管軍揔管鎮金山居四年海盜屏絕徙鎮上海督造海舟六十艘兩月而畢至元十二年始運江南糧而河運弗便十九年用丞相伯顏言初通海道漕運抵直沽以達京城立運糧萬戶三而以璧與朱清張瑄爲之乃首部漕舟由海洋抵揚村不數十日入京師賜金虎符進懷遠大將軍管軍萬戶兼管海道運糧二十四年乃顏叛璧復以漕舟至遼陽浮海抵錦州小凌河至廣寧十寨諸軍賴以濟加昭勇大將軍二十五年督漕至直沽倉潞河決水溢幾及倉璧樹柵率所部畚土築堤捍之陞昭毅大將軍同知淮西道宣慰司事請兩淮荒閑之田給貧民耕墾三年而後量收其入從之歲得粟數十萬斛陞鎮國上將



軍海北海南道宣慰使都元帥大德三年除饒州路  
總管改廣東道宣慰使都元帥山海獠夷不沾王化  
負固反側乃誘致諸洞蠻夷酋長假以官位曉以禍  
福由是咸率衆以歸除都水監改正奉大夫通州復  
多水患鑿二渠以分水勢又浚阜通河而廣之歲增  
漕六十餘萬石奉命括兩淮屯田得疾歸鎮江而卒  
年六十六子坤載

### 劉恩

劉恩字仁甫洛之洛水人後徙威州父辛歸國署貝  
州長恩幼知讀書勇而有謀以材武隸軍籍累功爲

百戶俄遷管軍總管佩銀符大傅府經歷從入蜀數  
有戰功宋劉整將兵守瀘州中統三年都元帥紐璘  
遣恩諭整降以功易賜金符至元三年宋將以戰船  
五百艘載甲士三萬人夾江上游先以一萬人據雲  
頂山欲取漢州恩率千人渡江與戰殺其將二人士  
卒三千餘人溺死者不可勝計授成都路管軍副萬  
戶六年從平章賽典赤攻嘉定過九頂山與宋軍遇  
生擒其部將十八人械送京師賞賚甚厚九年從皇  
子西平王行者也速帶兒征建都恩將游兵爲先鋒  
師次其地一日三戰皆捷建都兵夜來犯圍恩禦之



死者千餘人時師久駐食且盡恩畫策招諭沿江諸蠻得糧三萬石牛羊二萬頭士氣益振建都因山爲城山有七巔恩奪其五斷其汲道建都窮蹙乃降入朝升管軍萬戶成眉州十二年督萬壽以嘉定降恩移戍嘉定安西王遣使召恩至六盤山問曰江南已平四川未下奈何恩曰若以重臣之不徇私者奉詔督責之則半年可下矣王即遣恩與府僚木兒赤乘傳以聞帝以爲然命丞相不花等行樞密院於西川授恩同僉院事十五年重慶降守將張萬走夔府以兵固守不花遣恩招之萬以城降旬月之間得其大

小州邑六十四十六年入朝賞賚有加授四川西道宣慰使改副都元帥率蒙古漢軍萬人征幹端進都元帥宣慰使如故賜宿烈孫皮衣一錦衣一及弓刀諸物師次甘州奉詔留屯田得粟二萬餘石十八年命恩進兵幹端海都將玉論亦撒率兵萬人迎戰游騎先至恩設伏以待大敗之海都又遣八把率衆三萬來侵恩以衆寡不敵成師而還二十二年僉行樞密院事卒子德祿罷成都管軍萬戶

### 石高山

石高山德興府人父忽魯虎以侍衛軍從太祖定中



原太宗賜以東昌廣平四十餘戶遂徙居廣平之洛水中統三年高山因平章塔察兒入見世祖因奏曰在昔太祖皇帝所集按察兒孛羅窟里台孛羅海拔都闊闊不花五部探馬赤軍金亡之後散居牧地多有入民籍者國家土宇未一宜加招集以備驅策帝大悅曰聞卿此言猶寐而覺即命與諸路同招集之既籍其數仍命高山佩銀符領之四年授管軍總管鎮息州軍令嚴肅寇不敢窺居四年邊境晏然賜金符以獎之至元八年從取光州克棗陽進攻襄樊皆有功十年從阿朮略地淮上十一年從下江南以功

陞顯武將軍十二年冬丞相伯顏命以所部兵取寧國下令無虜掠既至城下喻以禍福寧國開門迎降秋毫無犯後令兵從至焦山與宋將孫虎臣張世傑轉戰百餘里殺獲甚多以功賜金虎符進信武將軍鎮高郵宋平伯顏等朝京師帝問有瘦而善戰者朕忘其名伯顏以高山對且盛稱其功帝即召見命高山自擇一大郡以佚老而以所部軍俾其子領之高山辭曰臣筋力尚壯猶能爲國驅馳豈敢爲自安計帝從之進顯武將軍領兵北征屯亦脫山十六年命同忽都魯領三衛軍戍和林因屯田以給軍儲歲不



之用乃顏叛督戰有功賜三珠虎符蒙古侍衛親軍都指揮使守衛東宮成宗憫其老以其子闊闊不花罷職賜鈔三百錠大德七年卒於家年七十六

### 鞏彥暉

鞏彥暉易州人與兄彥榮俱以武勇稱初彥榮以百夫長隸千戶何伯祥麾下累有戰功後告老以彥暉代之諸軍伐宋彥暉從破棗陽斬首甚衆萬戶張柔之駐曹武也彥暉與伯祥別將一軍破大洪諸寨宋人出荆鄂選兵二萬救之彥暉與伯祥逆戰斬首五百級生擒曹路分等一十六人是夜宋兵來攻彥暉

率甲士三十人追擊于曹武鎮敵潰走擒其主將以歸戰光州柔軍于東北夜二鼓命彥暉率勁卒二百伏西南五鼓東北聲振天地彥暉植梯先登衆繼之破其外城遂急攻并其子城破之戰滁州彥暉率浮渾脫者十人夜渡池水入欄馬墻殺守軍三鋪焚其東南角排寨木簾大軍繼之比明拔其城會大軍攻黃州諸將壁壘未定有舟來覘柔遣彥暉伏甲二百於赤壁之下敵軍夜半果水陸並至彥暉等曳槍俟其半過而擊之敵大撓死者無筭生擒十七人師還又破張家寨以守將獻從攻壽州奪其門生擒三人



以出泗州之役諸將自四鼓集城下爲塹水所阻黎明無敢渡者兩軍交射如雨彥暉被重甲徑渡敵將來禦彥暉刺其脅搏殺之衆畢渡至晡得其外城尋登其月城彥暉將下顧伯祥失所在乃與王進反來之敵復追襲彥暉力戰翼伯祥以出由是伯祥與彥暉如親昆弟然事聞賜彥暉銀符牌俾兼鎮撫事歲己未十一月兵渡江次武昌宋援兵四集彥暉逆戰有舟數十來挑戰彥暉逐之入湖中伏出圍彥暉數匝左右莫能近彥暉矢盡短兵接身被重傷度不可免遂投水中敵援之出載歸江州見宋官不屈問以

事不對竟死年五十六長子信襲授銀符易州等處管軍總把中統三年從征李璫至元四年從元帥阿朮南征九年從攻樊城先登奪其土城焚西南角樓殺敵軍十人擒五人宋將矮張以舟兵來援自高頭堡戰鬪八十餘里抵襄陽城下奪戰艦二獲其裨將二人軍八人十一年從丞相伯顏攻沙陽堡率勇士五十縱火焚其寨敵軍大亂遂破之是年從渡江與宋兵戰俘生口十一奪戰艦二繼又領軍由陸進直抵鄂城下殺宋兵數十人擒江路分一人以歸十二年戰丁家洲殺宋兵七十餘人奪戰艦二江南平以

嘉靖十年補刊

元史列傳卷五十三

九

王孫高



功陞武略將軍管軍千戶鎮太平州十六年以疾辭  
子思明思溫思恭思明初患目疾以思溫襲及思溫  
卒而思明疾愈復以思明襲思明卒以思恭襲懷孟  
萬戶府管軍下千戶佩金符

### 蔡珍

蔡珍彰德安陽人父興幼隸軍籍從宗王口溫不花  
出征權管軍百戶興告老以珍代之珍素驍勇歲戊  
午從憲宗攻宋合州釣魚山中統元年從世祖征阿  
里不哥三年從征李壇後從鎮襄陽徇安慶攻五河  
所至有功南方平遂入備宿衛十四年授忠顯校尉

管軍總把尋命權千戶是年冬扈駕駐黑城珍遣兵  
士儲芻藁築土室軍府賴其用道遇凍者必扶入密  
室溫煦之軍糧必為樽節不使頓絕以致饑困十五  
年充本衛都鎮撫十七年陞忠武校尉中衛親軍總  
把俄改屬後衛賜銀符時白海初建行營命珍督役  
卒事民不知擾雖草木無纖介損帝臨幸問其故近  
臣以蔡珍號令嚴肅為對帝嘉之賞以鈔若干二十  
一年改授膠東海道都漕運司丁壯萬戶府都鎮撫  
二十七年進後衛親軍千戶佩金符元貞元年進階  
武略俄告老而歸子恕襲



張泰亨

張泰亨堂邑縣人父山爲管軍百戶泰亨襲職從攻宋釣魚山及樊城征女兒阿塔有功中統二年授銀符侍衛軍總把三年從圍李壇有功至元四年賜金符陞京東歸德等處新軍千戶從征西川有功授元帥府鎮撫六年改省都鎮撫七年從攻襄陽矢中右臂十年從攻樊城十二年進武略將軍管軍總管尋進明威將軍從攻潭州矢中鼻拔矢奮戰却敵兵十三年賜虎符進階武德從征廣西破靜江府十四年還軍潭州金瘡發卒子繼祖襲移鎮鄂州舟過洞庭溺死子震幼以兄顯祖代之二十四年從征交趾陷沒震襲職授金符昭信校尉管軍上千戶延祐二年覃息加武略將軍尋進階武德五年陞武節將軍穎州萬戶府副萬戶天曆二年卒子珽襲

賀祉

賀祉益都人父進嘗平漣水有功爲元帥左監軍守淄州改千戶守膠州祉初以質子入宿衛至元六年襲父職爲千戶仍守膠州七年宋兵攻膠州祉固守戰退之十年領舟師五百艘爲先鋒攻五河口城軍還殿後時宋兵以巨索橫截淮水號混江龍祉用大



刀斷之却其救兵清河城遂降攻高郵寶應戰淮安  
城下尸填壕中丞相伯顏以其功上聞授武節將軍  
攻泗州獲戰船五百艘還從右丞別乞里迷失入朝  
帝賜以弓矢錦衣鞍勒加宣武將軍鎮新城絕淮安  
寶應糧道降之得戰船六百艘及器械上於行樞密  
院遂命領寶應軍民事十四年特賜金虎符懷遠大  
將軍二十年建寧路黃華反以所領軍捕之有功二  
十四年以征交趾請行湖廣行省檄令守輜重屯思  
明州軍還至建康卒

### 孟德

孟德濟南人國初由鄒平縣令淄州節度使累官至  
同知濟南路事太宗即位之八年諸王闊端命德為  
元帥佩金符領濟南軍攻宋徐州光州降其衆而有  
其地歲甲辰定宗母六皇后稱制大王按只台以德  
為萬戶攻濠蘄黃等州積有戰功憲宗即位之三年  
命德守睢州五年移守海州宋安撫呂文德以兵擾  
邊德敗之俘其太尉劉海丁巳從伯顏攻襄樊己未  
與子義從世祖攻鄂州先登中統三年從征李璫璫  
平德以老告歸義襲為萬戶領兵守沂邳四年賜虎  
符至元元年城邾六年從山東統軍帖赤如五河宋



元史傳卷五十三  
軍拒南岸義率兵渡河擊之凡數戰有功九年授懷遠大將軍遷宿州萬戶十一年宋制置夏貴攻正陽義奪戰艦數艘遂敗之十二年掠地至安慶等處攻揚子橋獲功十三年三月改守杭州九月從下福建温台等處十四年四月授昭勇大將軍瑞州路達魯花赤十月徙鎮閩州十六年授昭勇大將軍招討使二十二年復為沂邳萬戶元貞元年以老辭職子智襲職授三珠虎符宣武將軍為萬戶延祐二年進明威將軍以病去職子安世襲

鄭義

鄭義河間人也初事太宗佩金符山東路都元帥兼景州軍民人匠長官從伐金歲壬辰與敵戰于歸德死之弟德温襲甲午從攻徐州隔陣而死子澤襲從萬戶史天澤出征多立戰功年老弟江代其職世祖北征賜金符授侍衛親軍副都指揮使判武衛軍事兼景州軍民人匠長官中統三年李壇據濟南叛世祖令各州縣長官子弟充千戶於是江子郇為千戶領景州新簽軍千餘敗賊衆于玉馬橋諸王哈必赤賞銀五十兩壇平郇以例罷江陞為武衛親軍都指揮使賜虎符尋改屬左衛至元八年從攻襄陽歿



于陳卽襲其職

張榮實子玉附

張榮實霸州保定縣人父進金季封北平公守信安城壬辰歲率所部兵民降太宗命為征行萬戶甲午征河南與金將國用安戰徐州死焉榮實始以質子入宿衛繼授金符充征行水軍千戶丁酉改雄州保定新城長官庚子復命統領水軍甲辰從大將察罕軍至淮上遇宋將呂文德與戰俘五十餘人賞銀橈戰馬從攻江陵略襄陽宋以舟師橫截漢水兵不得渡榮實戰却之獲人百餘戰船數十艘察罕以聞賜

錦袍及銀十五斤又破宋軍于大湖賞銀百兩己未從世祖南征駐陽羅渡宋兵十萬舟二千迎戰橫截江水帝以榮實習於水命居前列遂取輕舟率麾下水校鏖戰北岸獲宋大船二十俘二百溺死不可勝計斬宋將呂文信中統元年帝即位錄其勲勞授金虎符水軍萬戶仍以其子顏代為霸州七處管民萬戶三年李璫叛榮實從史天澤討平之賞金盃及銀二百五十兩馬一疋命鎮膠西至元五年從丞相阿朮攻襄陽敗夏貴擒張順又攻樊城俘其二將賞銀百兩及弓矢鞍勒十一年增領新軍從丞相伯顏南



征榮實以所部軍先進諸將飛渡鄂漢皆降論功授  
昭毅大將軍從阿里海牙攻岳州降宋將高世傑破  
沙洋新市降江陵以功加昭武大將軍偕元帥宋都  
台征江西隆興擒宋將密佑撫州降十三年授同知  
江西道宣慰使司事未旬日陞鎮國上將軍福建道  
宣慰使進兵廣東破降韶州十四年改江東宣慰使  
行省叅知政事帝以廣東餘黨未附命與右丞塔出  
撫定之十五年入覲帝賜酒慰勞授湖北道宣慰使  
諸路水軍萬戶是年以疾卒年六十一子顏玉珪  
玉襲父職爲懷遠大將軍諸路水軍萬戶十六年討

吉安叛賊有功入朝賜金織文衣弓矢佩刀加輔國  
上將軍都元帥兼水軍萬戶鎮黃州繼奉旨與元帥  
唐兀台改立蘄黃等路都元帥府仍管領本道鎮守  
軍馬二十年廣東盜起遏絕占城糧運二十一年王  
率兵討平之從叅知政事也的迷失入朝賜金織文  
衣鞍勒弓刀會元帥罷命玉充保定水軍上萬戶二  
十二年番陽湖賊起詔徙水軍萬戶府於南康二十  
四年從叅知政事烏馬兒征交趾累戰有功二十五  
年師還安南以兵迎戰大戰連日水涸舟不能行玉  
死焉子輔襲萬戶輔卒子道重襲



石抹狗狗

石抹狗狗契丹人其先曰高奴歲辛未太相至威寧高奴與劉伯林夾谷常哥等以城降會置三萬戶三十六千戶以總天下兵遂以高奴為千戶遥授青州防禦使佩金符己丑從太宗伐金為征行千戶卒于軍于常山襲為千戶癸丑陞總管領興元諸軍與魯屯田并寶鷄驛軍權都總管萬戶歲餘卒于乞兒襲領本萬戶諸翼軍馬從都元帥紐璘攻重慶瀘叙諸城數有戰功時忽都叛於臨洮乞兒等以蒙古漢軍從往討之至元二年從都元帥按敦移鎮潼川四年

九月從攻蓬溪砦死焉子狗狗襲狗狗少從征伐以壯勇稱八年從僉省嚴忠範以兵圍重慶攻朝陽砦先登九年宋將魯萬壽率眾襲成都狗狗以蒙古軍二千擊敗之十六年朝廷錄其前後功賜金虎符授宣武將軍管軍總管戍遂寧十七年進明威將軍管軍副萬戶亦奚不薛蠻叛從招討使樂刺海討平之行省也速帶兒討都掌烏蒙蟻子諸蠻戰于鴨樓關狗狗最有功二十一年以蒙古軍八百從征散猫蠻戰於菜園坪漆水溪皆敗之壁守石砦月餘散猫降大盤諸蠻亦降二十四年遷懷遠大將軍夔路萬戶



移戍重慶二十六年卒子安童襲

### 楚鼎

楚鼎安豐蒙城人父珩仕金爲鎮國上將軍壽春府防禦使金亡歸宋命守宿州歲己亥以州降阿木魯命珩守之宋兵來攻宿州城破珩死之宋人囚鼎於鎮江府凡十有四年會赦免至元十二年師渡江鼎從知太平州孟之縉降行省遣鼎諭寧國府守將孫世賢下之承制授鼎管軍總管制下加懷遠大將軍領兵鎮寧國平建平南湖廣德諸盜鼎與權萬戶李羅台護送徽州招撫使李銓男漢英歸徽州諭銓下

其城十三年漢英與李世達叛旌德太平兩縣附之鼎與兀忽納進兵用徽人鄭安之策按兵而入兵不血刃而亂定十五年鼎始受符印十八年東征日本鼎率千餘人從左丞范文虎渡海大風忽至舟壞鼎挾破舟板漂流三晝夜至一山會文虎船因得達高麗之金州合浦海屯駐散兵亦漂泛來集遂領之以歸

### 樊楫

樊楫冠州人初爲軍吏從叅政阿里海牙下鄂江陵有功以行省命爲都事宋平從入朝改貞外部郎從定



廣西陞郎中從攻厓山進參議行中書省事同知湖南宣慰司事二十一年擢僉荆湖占城行中書省事從阿里海牙征交趾無功而還二十四年復征交趾進行中書省叅知政事時三道進兵皇子鎮南王與右丞程鵬飛分二道一入永平一入女兒關楫與參政烏馬兒將舟師入海與賊舟遇安邦口楫擊之斬首四千餘級及生擒百餘人獲船百餘艘兵仗無算遂至萬劫山合鎮南王兵十二月進攻交趾陳日烜棄城走敢喃堡二十五年正月王攻敢喃堡破之日烜走入海中交人皆匿其粟而逃張文虎餽餉不至二月天暑食且盡於是王命班師楫與烏馬兒將舟師還為賊邀渡白藤江潮下楫舟膠賊舟大集矢下如雨力戰自卯至酉楫被創投水中賊鉤執毒殺之至順元年贈推忠宣力効節功臣資德大夫江浙行省右丞上黨郡公謚忠定

張均

張均濟南人也父山從軍伐宋以功為百戶俄陞總把戰死均襲百戶從親王塔察兒攻鄂州面中流矢中統三年從征李壇有功以總帥命陞千戶領兵守淄州至元六年從左丞董文炳攻宋五河口轉戰濠



元史列傳卷五十三  
州北遇其伏兵均率眾力戰敗之十年攻連州奪孫  
村堡十二年賜金符授忠翊校尉沂鄒翼千戶從攻  
蕪湖奪宋戰船俘四十餘人又從丞相阿塔海戰有  
功加武畧將軍十四年賜虎符加宣武將軍二十二  
年陞松江萬戶二十四年從鎮南王征交趾二十六  
年從北征擢明威將軍前衛親軍副都指揮使三十  
年世祖親征乃顏以扈從受賞成宗即位命屯田和  
林規畫備悉有法諸王藥木忽兒北征給餉賴之未  
嘗乏絕帝嘉其能賜予有加大德元年改和林等處  
副元帥歷宣尉司同知陞都元帥加鎮國上將軍延  
祐元年卒子世忠襲前衛親軍副都指揮使

信苴日

信苴日僂人也姓段氏其先世爲大理國王後累爲  
權臣高氏所廢歲癸丑當憲宗朝世祖奉命南征誅  
其臣高祥以段興智主國事乙卯興智與其季父信  
苴福入覲詔賜金符使歸國丙辰獻地圖請悉平諸  
部并條奏治民立賦之法憲宗大喜賜興智名摩訶  
羅嗟命悉主諸蠻白蠻等部以信苴福領其軍興智  
遂委國任其弟信苴日自與信苴福率僂蠻軍二萬  
爲前鋒導大將兀良合台討平諸郡之未附者攻降



交趾入朝興智在道上卒中統二年信苴日入覲世祖復賜虎符詔領大理善闡威楚統失會川建昌騰越等城自各萬戶以下皆受其節制至元元年舍利畏結威楚統失善闡及三十七部諸爨各殺守將以叛善闡屯守官不能禦遣使告急信苴日率衆進討大敗之於威楚寶滿裔復遣孛羅攻賊於統失城又大破之遂定統失其秋舍利畏又以衆十萬謀攻大理詔都元帥也先與信苴日討之師至安寧遇舍利畏擊破走之遂復善闡降威楚定新興進攻石城肥臆皆下之爨部平三年信苴日入覲錄功賜金銀衣服

鞍勒兵器十一年賽典赤爲雲南行省平章政事更定諸路名號以信苴日爲大理總管未幾舍利畏復叛信苴日遣石買等詭爲商旅執贄往見挺矛撞殺之及其黨一人梟首于市行省以聞復賜金一錠及金織紋衣於是置郡縣署守令行賦役施政化與中州等十三年緬國擁衆騎數萬掠金齒南甸欲襲大理行省遣信苴日與萬戶忽都領騎兵千人禦之信苴日以功授大理蒙化等處宣撫使十八年信苴日與其子阿慶復入覲帝嘉其忠勤進大理威楚金齒等處宣慰使都元帥留阿慶宿衛東宮及陞辭復



拜爲雲南諸路行中書省叅知政事十九年詔同右丞拜答兒迎雲南征緬之師行至金齒以疾卒信直日治大理凡二十三年子阿慶襲爵累授鎮國上將軍大理金齒等處宣慰使都元帥佩金虎符

### 王昔刺

王昔刺保定人初事世祖以其有勇畧遂賜名昔刺拔都從攻釣魚山及阿里不哥累功賜金符授武衛親軍千戶中統三年從征李璫於濟南屢捷四年春元帥阿朮駐兵河南遣昔刺將蒙古漢軍復立宿州至元六年賜虎符陞海州萬戶引兵攻鹽林山寨多

所俘獲十年授東川行樞密院同僉十五年征夔府有功十六年徙鎮萬州卒于軍子二曰宏曰寧宏先佩金符爲左衛千戶及樞密院擬寧襲武職寧讓其兄宏於是授宏中衛都指揮使佩父虎符而以寧代宏爲千戶佩金符寧從阿剌台熬合孫北征追擊脫脫木兒之軍于阿納禿阿之地師還又從別急里迷失等擊賊外刺斬首百餘級復從忽魯忽孫北征有功陞右衛親軍總管後改前衛都指揮使司僉事子處恭襲宏職仕至侍御史

### 趙宏偉



趙宏偉字子英甘陵人後徙潁川至元十三年國兵攻宋宏偉以書謁元帥宋都解於軍中竒之俾以兵略地臨江至吉州宋主將管忠節路分鄒超悉衆出戰宏偉敗之追北二十餘里薄其城示以禍福知州周天驥以城降宋都解嘉宏偉有功賞銀三十兩署爲吉州叅佐官吉民有爲亂者宏偉設伏橋下以火攻之賊戰退走伏發衆蹂踐幾盡乘勝擣其巢穴餘黨悉出拒戰宏偉旋兵襲其背斬其渠魁一州遂安宋廂禁軍總管王昌勇敢軍總管張雲誘新附五營軍爲亂事覺昌就擒宏偉夜襲雲斬首以獻俘其黨

五百人宋都解欲盡誅之宏偉曰此屬誣誤非得已也今悉就誅何以安反側衆得免死以功授太和縣尹宋相文天祥署其將羅開禮葉良臣集衆謀復吉贛臨江宏偉斬良臣俘開禮釋其餘衆十五年以功賜金符遷瓜州河渡提舉十七年改衡州路總管府治中群盜出沒其境宏偉計其地興屯田民旣足食盜亦爲農郡遂寧謐大德五年用中丞董士恒薦起僉浙西道肅政廉訪司事鎮江旱蠲民租九萬餘石吏畏飛語復徵于民民無所出行臺令宏偉核實卒蠲之大風海溢潤常江陰等州廬舍多蕩沒民乏食



宏偉將發廩以賑有司以未得報為辭宏偉曰民旦暮飢擅發有罪我先坐遂發之全活者十餘萬遷江南行臺都事十一年江南大饑宏偉請以贓罰錢賑之民賴以生至大二年召為內臺都事仁宗在東宮時聞其名遇之甚厚常以字呼之及出為浙東廉訪副使陞辭之曰仁宗出幣帛俾擇所欲者即賜之宏偉至浙東聞郡人許謙得朱熹道學之傳延致為師於是人知向慕未幾擢江南行臺治書侍御史皇慶二年致仕延祐三年復起為福建道肅政廉訪使未幾以疾辭泰定三年卒年四十四贈嘉議大夫禮部尚書上輕車都尉追封天水郡侯諡貞獻子思恭追封天水郡侯思敬以處士徵為教授趙璉別有傳



列傳卷第五十三

列傳卷第五十四

元史一百六十七

翰林學士知制誥兼修國史臣家濂翰林一制承直學士知制誥兼國史院編修官臣禧等奉

張立道

張立道字顯卿其先陳留人後徙大名父善登金進士第歲壬辰國兵下河南善以策干太弟拖雷命為必闈赤立道年十七以父任備宿衛世祖即位立道從北征未嘗去左右至元四年命立道使西夏給所部軍儲以幹敏稱皇子忽哥赤封雲南王往鎮其地詔以立道為王府文學立道勸王務農以厚民即署



立道大理等處勸農官兼領屯田事佩銀符尋與侍郎霽端甫使安南定歲貢之禮雲南三十七部都元帥寶合丁專制歲久有竊據之志忌忽哥赤來爲王設宴置毒酒中且賂王相府官無泄其事立道聞之趨入見守門者拒之立道怒與爭王聞其聲使人召立道乃得入爲王言之王引其手使探口中肉已腐矣是夕王薨寶合丁遂據王座使人諷王妃索玉印立道潛結義士得十三人約共討賊刺臂血和金屑飲之推一人走京師告變事頗露寶合丁乃囚立道將殺之人匠提舉張忠者燕人也於立道爲族兄結壯士夜劫諸獄出之共亡至上蕃界遇帝所遣御史大夫博羅歡王傅別帖與告變人俱來二人者遂與立道俱還按寶合丁及王府官嘗受賂者皆伏誅有旨召立道等入朝問王薨時狀帝聞立道言泣數行下歎歎久之曰汝等爲我家事甚勞苦今欲事朕乎事太子乎事安西王乎惟汝意所向立道等奏願留事陛下於是賜立道金五十兩以旌其忠張忠等亦皆授官有差八年復使安南宣建國號詔立道並黑水跨雲南以至其國歲貢之禮遂定十年三月領大司農事中書以立道熟於雲南奏授大理等



處巡行勸農使佩金符其地有昆明池介碧鷄金馬之間環五百餘里夏潦暴至必冒城郭立道求泉源所自出役丁夫二千人治之洩其水得壞地萬餘頃皆爲良田變棘之人雖知蠶桑而未得其法立道始教之飼養收利十倍於舊雲南之人由是益富庶羅羅諸山蠻慕之相率來降收其地悉爲郡縣十五年除忠慶路總管佩虎符先是雲南未知尊孔子祀王逸少爲先師立道首建孔子廟置學舍勸士人子弟以學擇蜀士之賢者迎以爲弟子師歲時率諸生行釋菜禮人習禮讓風俗稍變矣行省平章賽典赤表言於朝有旨進宮以褒之十七年入朝力請於帝以雲南王子也先帖木兒襲王爵帝從之遂命立道爲臨安廣西道宣撫使兼管軍招討使仍佩虎符陞辭賜以弓矢衣服鞍馬始赴任會未泥路大首領必思反扇動諸蠻夷亟發兵討之拔其城邑鼓行而前徇金齒甸七十城越麻甸抵可蒲皆下之有遺以馴象金鳳異物者悉獻諸朝二十二年又籍兩江儂士貴峯從毅李維屏所部戶二十五萬有奇以其籍歸有司遷臨安廣西道軍民宣撫使復創廟學於建水路書清白之訓于公廡以警貪墨風化大行入朝值權臣



用事遂退居散地條陳十二策皆切當世之務帝嘉納焉二十七年北京地陷人民震驚命立道爲本路總管未行安南世子陳日燭遣其臣嚴仲羅陳子良等詣京師告襲爵先是其國主陳日烜累召不至僅遣其族父遺愛入貢朝廷曰封爲安南王遺愛還日烜陰害之遣使問罪日烜拒使者不受命遂遣將討之失利而還帝怒欲再發兵丞相完澤平章不忽木言蠻夷小邦不足以勞中國張立道嘗再使安南有功今復使往宜無不奉命帝召至香殿諭之曰小國不恭今遣汝往諭朕意宜盡乃心立道對曰君父之命雖蹈水火不敢辭臣愚恐不足專任乞重臣一人與俱臣爲之副帝曰卿朕腹心臣使一人居鄉上必敗卿謀遂授禮部尚書佩三珠虎符賜衣段金鞍弓矢以行至安南界謂郊勞者曰語爾世子當出郭迎詔日燭乃率其屬焚香伏謁道左既抵府日燭拜跪聽詔如禮立道傳上命數其罪爲書曉之日燭曰比三世辱公使公大國之卿小國之師也何以教我立道曰昔鎮南王奉詞致討汝非能勝之也由其不用嚮導率衆深入不見一人遲疑而還曾未出險風雨驟至弓矢盡壞衆不戰而自潰天子亦既知之汝所



恃者山海之險瘴癘之惡耳且雲南與嶺南之人習俗同而技力等今發而用之繼以北方之勁卒汝復能抗我汝戰不利不過遁入海中島夷乘釁必來寇抄汝汝食少不能支必為彼屈汝為其臣孰若為天子臣乎今海上諸夷歲貢於汝者亦畏我大國之爾與也聖天子有德於汝甚厚前年之師殊非上意邊將讒汝爾汝曾不悟不能遣一介之使謝罪請命輒稱兵抗拒遂我使人以怒我大國之師今禍且至矣惟世子計之日燭拜且泣涕而言曰公之言良是也為我計者皆不知出此前日之戰救死而已寧不知

懼天子使公來必能活我北面再拜誓死不敢忘天子之德遂迎立道入出奇寶為賄立道一無所受但要日燭入朝日燭曰貪生畏死人之常情誠有詔貸以不死臣將何辭乃先遣其臣阮代之何惟巖等隨立道上表謝罪修歲貢之禮如初且言所以願朝之意廷臣有害其功者以為必先朝而後赦日燭懼卒不敢至議者惜之二十八年遣立道奉使按行兩浙尋以為四川南道宣慰使遷陝西漢中道肅政廉訪使三十年皇曾孫松山封梁王出鎮雲南大德二年廷議求舊臣可為梁王輔行者立道遂以陝西行臺



侍御史拜雲南行省叅政視事期月卒于官立道凡  
三使安南官雲南寂久頗得土人之心爲之立祠於  
鄯善城西立道所著詩文有效古集平蜀總論安南  
錄雲南風土記六詔通說若干卷子元雲南行省左  
右司郎中

張庭珙 虞瑞

張庭珙字國寶臨潢全州人父楫金商州南倉使歲  
壬辰籍其民數千來降太宗命監榷北京等路賦課  
俄改北京都轉運使因家北京歲辛亥憲宗即位以  
庭珙爲必闡赤高麗不請命擅徙居海中江華島遣  
庭珙往問之其王言臣事本朝未嘗不謹而大軍歲  
入侵掠避而走險不得已也且賂庭珙金銀數千兩  
庭珙却之而歸以狀聞帝爲禁戍兵無擅入其地高  
麗以安帝伐宋至閩州授安撫使世祖即位自將北  
伐以庭珙熟知西京入漠南路遣立沙井諸驛兼給  
糧運俄授同僉土蕃經畧使至元六年安南入貢不  
時以庭珙爲朝列大夫安南國達魯花赤佩金符由  
吐蕃大理諸蠻至于安南世子光昞立受詔庭珙責  
之曰皇帝不欲以汝土地爲郡縣而聽汝稱藩遣使  
喻旨德至厚也王猶與宋爲唇齒妄自尊大令百萬



之師圍襄陽拔在旦夕席卷渡江則宋亡矣王將何恃且雲南之兵不兩月可至汝境覆汝宗祀有不難者其審謀之光昞惶恐下拜受詔既而語庭珎曰聖天子憐我而使者來多無禮汝官朝列我王也相與抗禮古有之乎庭珎曰有之王人雖微序於諸侯之上光昞曰汝過益州見雲南王拜否庭珎曰雲南王天子之子汝蠻夷小邦特假以王號豈得比雲南王况天子命我為安南之長位居汝上耶光昞曰既稱大國何索吾犀象庭珎曰貢獻方物藩臣職也光昞無以對益慚憤使衛兵露刃環立以恐庭珎庭珎解所佩弓刀坦臥室中曰聽汝何為光昞及群下皆服明年遣使隨庭珎入貢庭珎見帝以所對光昞之言聞帝大悅命付翰林承旨王磐紀之授襄陽行省郎中與阿里海牙從數騎抵襄陽南門呼宋將呂文煥語曰我師所攻無不取者汝孤城路絕外無一兵之援而欲以死守求空名如闔郡之人何汝宜早圖之文煥帳前將田世英曹彪執其總管武榮來降文煥益孤明日遣黑楊都統來議納款將遣之還報庭珎曰彼來或以計覘我未能必其果降此人呂氏腹心不如留之以伐其謀元帥阿木然之乃留不遣又明



日文煥舉城降以功遷中順大夫遙授知歸德府行  
樞密院經歷諸軍南渡復為行省郎中俄授金虎符  
襄陽總管兼府尹改郢復二州達魯花赤宋平遷平  
江路達魯花赤改同知浙東宣慰使司事未行拜大  
司農卿連居親憂起復南京路總管兼開封府尹開  
封有控鶴軍士十餘人賃大宅聚居縱橫街陌庭珎  
始至察其必為盜急捕之得寶玩器服子女滿室窮  
索其黨俱殺之民以為神河決灌大康漂溺千里庭  
珎括商人漁子舩及縛木為筏載糗糧四出救之全  
活甚衆水入善利門庭珎親督夫運薪土捍之不能

止乃頽城為堰水既退即發民增外防百三十里人  
免水憂俄卒於官庭珎性清慎丞相伯顏嘗語人二  
諸將渡江無不荒貪唯我與國寶始終自守聞者以  
為知言弟庭瑞

庭瑞字天表幼以功業自許兵法地志星曆卜筮無  
不推究以宿衛從憲宗伐蜀為先鋒中統二年授元  
帥府叅議留戍青居諸軍攻開州達州庭瑞將兵築  
城虎嘯山扼二州路宋將夏貴以師數萬圍之城當  
砲皆穿築柵守之柵壞乃依大樹張牛馬皮以拒砲  
貴以城中人飲于澗外絕其水庭瑞取人畜溲沸煮



之瀉土中以洩臭人日飲數合唇皆瘡裂堅守踰月  
援兵不敢進庭瑞度宋兵稍懈三分其兵夜劫貴營  
宋兵驚潰殺都統欒俊雍貴胡世雄等五人斬千餘  
級庭瑞亦被傷數處以功授奉議大夫知高唐州改  
濮州尹遷陝西四川道按察副使政過於猛上官弗  
便陷以罪徙四川屯田經畧副使東西川行樞密院  
發兵圍重慶朝廷知庭瑞練習軍事換成都總管佩  
虎符舟楫兵仗糧儲皆倚以辦蜀平陞諸蠻夷部宣  
慰使甚得蠻夷心碭門羗與婦人老幼入市爭價殺  
入碭門魚通司繫其人羗酋怒斷繩橋謀人劫之魚

通司來告急左丞汪惟正問計庭瑞曰羗俗暴悍以  
鬪殺爲勇今如蜂毒一人而即以門墻之寇待之不  
可宜遣使往諭禍福彼悟當自回矣惟正曰使者無  
過於君遂從數騎抵羗界羗陳兵以待庭瑞進前語  
之曰殺人償死羗與中國之法同有司繫諸人欲以  
爲見證耳而汝即肆無禮如行省聞于朝召近郡兵  
空汝巢穴矣其酋長棄槍弩羅拜曰我近者生裂羊  
脾卜之視肉之文理何如則吉其兆曰有白馬將軍  
來可不勞兵而罷今公馬果白敢不從命乃論殺人  
者餘盡縱遣之遂與約自今交市者以碭門爲界無



相出入官買蜀茶增價鬻於羗人以為患庭瑞更變引法使每引納二緡而付文券與民聽其自市於羗羗蜀便之先時運糧由楊山沂江往往覆陷庭瑞始立屯田人得免患都掌蠻叛蠻善飛鎗聯松枝為牌自蔽行省命庭瑞討之庭瑞所射矢出其牌半斡蠻驚曰何物弓矢如此之力即請服惟斬其酋蘭德酉等十餘人而招復其餘民授叙州等處蠻夷部宣撫使改潭州路總管時湖廣省臣方剝民為功庭瑞知不可拒乃辭歸關中三年思成都遂從漢中分家奴往居焉以疾卒庭瑞初屯青居其土多橘時中州艱得蜀藥其價倍常庭瑞課閑卒日入橘皮若干升儲之人莫曉也賈人有喪其資不能歸者人給橘皮一石得錢以濟莫不感之家有愛妾一日見老人與之語乃其父也妾以告庭瑞召視之其貌甚似問欲得汝女歸耶其人以為幸侍左右非敢求與歸庭瑞曰汝女居吾家不過群婢歸嫁則良人矣盡取奩裝書券還之時人以為難

張惠

張惠字廷傑成都新繁人宗尚書右僕射商英之裔孫也其先徙居清河後徙蜀歲丙申惠年十四兵入



蜀被俘至杭海居數年盡通諸國語丞相蒙速速愛而薦之入侍世祖藩邸以謹敏稱賜名兀魯忽訥特世祖即位授燕京宣慰副使為政寬簡奏免分數錢罷硝礮局俄遷侍中至元元年冬拜叅知政事行省山東以銀贖俘囚二百餘家為民其不能歸者使為僧建寺居之李壇之亂山東民被軍士虜掠者甚眾惠至大括軍中悉縱之又奏選良吏去冗官以蘇民瘼遷制國用司副使會改制國用司為尚書省拜叅知政事遷中書左丞進右丞伯顏帥師伐宋十二年夏詔惠主其饋餉九江淮錢穀皆領之十二年春宋

降伯顏命惠與參知政事阿剌罕等入城按閱府庫版籍收其太廟及景靈宮禮樂器物冊寶郊天儀仗籍江南民為工匠凡三十萬戶惠選有藝業者僅十餘萬戶餘悉奏還為民伯顏以宋主北還俾惠居守惠不待命輒啓府庫封鑰伯顏以聞詔左丞相阿朮平章政事阿塔海詰之徵還京師二十年拜榮祿大夫平章政事行省揚州二十二年入朝復命以平章政事行省杭州至無錫卒年六十二惠所至有能聲及老頗以沉浮取譏子遵誨

劉好禮



劉好禮字敬之汴梁祥符人父仲澤金大理評事遙授同知許州徙家保定之完州好禮幼有志知讀書通國言憲宗時廉訪府辟為叅議歲乙卯改永興府達魯花赤至元元年以侍儀廉希逸薦召見言舉人材數事稱旨五年應詔建言凡有司奏請宜先啓皇太子俾得閱習庶政以為社稷生民之福陝西重地宜封皇子諸王以鎮之創築都城宜給直以市民地選格不宜以中統三年為限後是者不錄帝是其言勅中書施行七年遷益蘭州等五部斷事官以比古之都護治益蘭其地距京師九千餘里民俗不知陶冶水無舟航好禮請工匠於朝以教其民迄今稱便或言權鹽酒可以佐經費好禮曰朝廷設官要荒務以綏遠寧欲奪其利耶言者慚服十年北方諸王叛執好禮軍中幾死其大將以好禮善應對釋之十六年春叛王召好禮至欠欠州曰皇帝疑我致有今日好禮曰不疑果疑王召王至京師肯還之耶十七年春好禮率衆走別部守阨以待兵至遇叛王軍迫好禮西踰雪峽嶺好禮自度踰是則無望其還遂以衣服賂叛王千戶始獲東出鐵壁山口間道南走數日從者繼至且千人中道糧絕捕獵以為食七月至菊海



始與戍兵接得乘傳至昌州入見帝賜之食與鈔十  
八年授嘉議大夫澧州路總管十九年入為刑部尚  
書俄改禮部又改吏部好禮建言中書象力最巨上  
往還兩都乘輿象駕萬一有變從者雖多力何能及  
未幾象驚幾傷從者二十一年出為北京路總管再  
入為戶部尚書二十五年六月卒年六十二子晟為  
河西隴右道肅政廉訪使

王國昌

子通

王國昌膠州高密人初為膠州千戶中統元年入覲  
世祖察其能遷左武衛親軍千戶佩金符召問軍旅

之事國昌奏對甚悉帝嘉之賜白金錦袍至元五年  
人有上書言高麗境內黑山海道至宋境為近帝命  
國昌往視之泛海千餘里風濤洶湧從者恐勸還國  
昌神色自若徐曰奉天子威命未畢事而遽返可乎  
遂至黑山乃還帝延見慰勞而東夷皆內屬惟日本  
不受正朔帝知隋時曾與中國通遣使諭以威德令  
國昌率兵護送道經高麗時高麗有叛臣據珍島城  
帝因命國昌與經畧使卯突史樞等攻拔之八年復  
遣使入日本乃命國昌屯於高麗之義安郡以為援  
冬十月卒于軍子通嗣



通初襲爵為左衛親軍千戶十二年從諸軍伐宋渡江鎮鄂州時潭州不下兵薄其城通以所將千人破其柵宋兵遁去通縱兵追擊殺獲甚衆以功進武節將軍從攻靜江下之十四年改侍衛親軍千戶明年通上書言今南方已定而北陲未安請屯田于和林率所部自効帝慰勞遣之從破敵兵于金山俘獲生口及馬羊牛駝不可勝計進顯武將軍賜金虎符陞僉左衛親軍都指揮使從討叛王乃顏遷副都指揮使明年屯田瓜沙諸州進階明威將軍武宗即位命總京城衛兵樞密院復奏通攝左丞領諸衛屯田兵尋遷屯儲衛親軍都指揮使鎮海口以疾卒子燕出不花襲武德將軍左衛親軍副都指揮使

姜或

姜或字文卿萊州萊陽人也父椿避亂往依濟南張榮因家焉或幼穎悟好學榮守濟南辟為掾陞左右司知事尋遷郎中進參議官中統三年或與榮孫宏入朝因言益都李壇反狀已露宜先其未發制之未報明年春壇果反時諸郡不為兵備壇即襲據濟南或棄家從榮招集散亡迎諸王哈必赤進兵討之秋七月捕得生口言城中糧盡勢蹙或乃昏夜請見王



曰聞王陞辭時面受詔曰發兵誅瓊耳毋及無辜今旦夕城且破王宜早諭諸將分守城門勿令縱兵不然城中無噍類矣王曰汝言城破解陰陽耶或曰以人事知之若待城破言於王晚矣王悟明日賊衆開門出降王下令諸軍敢入城者論以軍法瓊就擒城中按堵如故或以功授大都督府參議改知濱州時行營軍士多占民田爲牧地縱牛馬壞民禾稼桑棗或言於中書遣官分畫疆畔捕其強猾不法者寘之法乃課民種桑歲餘新桑徧野人名爲太守桑及遷東平府判官民遮請留馬爲之不行至元五年召拜

治書侍御史出爲河北河南道提刑按察使賜金虎符改信州路總管後累遷陝西漢中河東山西道提刑按察使拜行臺御史中丞後以老病歸濟南尋擢燕南河北道提刑按察使三十年二月以疾卒年七十六子迪吉

### 張礎

張礎字可用其先渤海入金末曾祖琛徙燕之通州祖伯達從忽都忽那顏略地燕薊金守其蒲察斤以城降忽都忽承制以伯達爲通判官遂知通州父範爲真定勸農官因家焉礎業儒丙辰歲平章



庶希憲薦于世祖潛邸時真定爲諸王阿里不哥分地阿里不哥以礎不附己銜之遣使言於世祖曰張礎我分地中人當以歸我世祖命使者復曰兄弟至親寧有彼此之間且我方有事於宋如礎者實所倚任待天下平定當遣還也已未從世祖伐宋凡徵發軍旅文檄悉出其手中統元年立中書省以礎權左右司事尋出爲彰德路拘權官復入爲三部員外郎賜金符爲平陽路同知轉運使改知獻州同知東平府事又改知威州有婦人乘驢過市者投下官暗赤之奴引鳴鏑射婦人墜地奴匿暗赤家礎將以其事聞暗赤懼乃出其奴論如法至元十四年立諸道提刑按察司以礎爲江南浙西道提刑按察副使佩金符宣慰使失里貪暴掠良民爲奴礎劾黜之遂安縣民聚衆負險爲亂命礎與同知浙西道宣慰使劉宣領兵捕之宣即欲進兵礎曰江南新附守吏或失撫字宜遣人招諭以全衆命宣不可礎曰諭之不来加誅未晚遂遣人諭之逆黨果自縛請罪礎釋之宣乃嘆服遷嶺南廣西道提刑按察使廣西宣慰使也里脫強奪民財礎按其罪遷嶺北湖南道提刑按察副使授賓州路總管不赴拜國子祭酒尋出爲安豐



路總管三十一年卒于官年六十三贈昭文館大學士正奉大夫封清河郡公謚文敏子淑衛輝路推官

### 呂盛

呂盛字伯充河內人七世祖公緒與宋丞相公著為從昆弟祖庭金未避亂去鄉里父佑歸附初隸兵籍轉徙北郡復至關中家焉廉希憲宣撫京兆聘許衡教授生徒盛從衡學衡為國子祭酒舉盛為伴讀輔成教養盛之功為多至元十三年擢陝西道按察司知事未行會宋降者言襄漢新附民情未安有呂子開者向為襄陽制置司參謀官今退居鄂其人悉知

宋事宜徵用之朝廷議遣使而難其人或言子開舊名偉金亂入宋更名文蔚字子開於盛為從叔父宜遣盛行時江淮兵猶未戢盛聞之慨然請行子開既入覲陳安撫襄漢便宜詔以子開為翰林直學士辭不就十四年授戡四川行樞密院都事時宋制置使張珏守重慶安撫使王立守合州詔樞府分兵取之李德輝行西院事于成都獲立偵卒張郃等數人將殺之盛曰彼不即降者以昔嘗抗命城降懼誅耳今宜釋郃等俾歸諭立未幾立果遣郃等賫蠟書至成都德輝請與東院同受降後期不至德輝承制授立



仍爲安撫使知合州開倉賑民禁戢剽掠而瀘叙崇慶思播夔萬等郡聞之相繼送款巴黔民感盛與德輝之惠並祠事之東院耻其無功誣德輝越境邀功械立于長安獄將誅之盛適以事至京師言于許衡衡白留守賀仁傑遂奏釋立賜金虎符仍舊官盛亦以平定四川功詔賜金織衣弓刀鞍勒白金陞奉訓大夫四川行省左右司郎中十九年調同知順慶路總管府事以疾辭二十年徵爲國子司業以未終喪辭三十年改華州知州勸農興學具有成效及代民爭留之大德中河東開隴地震月餘不止盛與集賢學士蕭與各設問答數千言以究其理且移書廟堂陳救災弭患之道仁宗即位召拜翰林侍讀學士時方議行科舉盛曰經明行脩質而少華非惟士有實行國家當得真才以登治平未幾致仕延祐元年遣使給驛送還關中十二月以疾卒年七十八贈陝西行省參知政事追封東平郡公謚文穆子三人杲果楨皆顯仕孫魯濟寧路總管

譚資榮

譚資榮字茂卿興德懷來人敦厚寡言頗知讀書仕金爲縣令歲己卯河朔歸版圖資榮率衆款附主帥



稔聞其名即日以金符授元帥左都監爲縣令如故  
後從征以功賜金虎符陞行元帥府事復以其弟資  
用代克元帥左監軍歲壬辰資榮從攻汴梁有功既  
而舉資用自代退而耕田讀書以爲逸老計時年四  
十子二人曰澄曰山阜澄好讀書又習國語爲監縣  
多善政世祖在潛邸時澄入見世祖嘉其容止安詳  
留居藩府稱其官而不名以其弟山阜代爲縣遣邇  
臣出使必以澄偕中統元年制書褒美以爲懷孟路  
總管明年入覲賜金符四年易虎符居官時訟至立  
決教民力田務本歷彰德同知遷河南南路總管兼府  
尹明年奔父喪中書不聽其終制奏起復涖職後歷司  
農少卿遷陝西四川提刑按察使踰年西南夷羅羅  
斯內附帝以澄文武兼資可使鎮撫新國以爲副都  
元帥同知宣慰使司事至其境諭之曰皇元一視同  
仁不間遠近特置大帥安集招懷以捍外侮非利徵  
求於汝也夷人大悅尋以疾卒子克脩事裕宗于東  
宮出爲江南湖北河北河南陝西漢中三道提刑按  
察使孫男三人曰忠曰質曰文

王暉

王暉字仲謀衛州汲縣人魯祖經祖字仕金官敦武



校尉父天鐸金正大初以律學中首選仕至戶部主  
事惲有材幹操履端方好學善屬文與東魯王博文  
渤海王旭齊名史天澤將兵攻宋過衛一見接以賓  
禮中統元年左丞姚樞宣撫東平辟爲詳議官時省  
部初建令諸路各上儒吏之能理財者一人惲以選  
至京師上書論時政與渤海周正並擢爲中書省詳  
定官二年春轉翰林修撰同知制誥兼國史院編脩  
官尋兼中書省左右司都事治錢穀擢材能議典禮  
考制度咸究所長同僚服之至元五年建御史臺首  
拜監察御史知無不言論列凡百五十餘章時都水

劉晟交結權勢任用頗專陷沒官糧四十餘萬石惲  
劾之暴其姦利權貴側目又言晟監脩太廟畢功特  
轉官錫賞今纔數年梁柱摧朽事涉不敬宜論如法  
晟竟以憂卒秩滿陳天祐雷膺交薦於朝九年授承  
直郎平陽路總管府判官初絳之太平縣民有陳氏  
者殺其兄行賂緩獄蔓引逮繫者三百餘人至五年  
不決朝廷委惲鞠之一訊即得其實乃盡出所逮繫  
者時絳父早一夕大雨十三年奉命試儒人于河南  
十四年除翰林待制拜朝列大夫河南北道提刑按  
察副使尋改置諸道制下遷燕南河北道按部諸郡



臧吏多所罷黜十八年拜中議大夫行御史臺治書  
侍御史不赴裕宗在東宮憚進承華事略其目曰廣  
孝立愛端本進學擇術謹習聽政達聰撫軍崇儒親  
賢去邪納誨幾諫從諫推恩尚儉戒逸知賢審官凡  
二十篇裕宗覽之至漢成帝不絕馳道唐肅宗改服  
絳紗爲朱明服心甚喜曰我若遇是禮亦當如是又  
至邢峙止齊太子食邪蒿頤侍臣曰一菜之名遽能  
邪人耶詹事丞孔九思從旁對曰正臣防微理固當  
然太子善其說賜酒慰喻之令諸皇孫傳觀稱其書  
弘益居多十九年春改山東東西道提刑按察副使

在官一年以疾還衛二十二年春以左司郎中召時  
右丞盧世榮以聚斂進用屢起之不赴或問其故澤  
曰力小任大剥衆利己未聞能全者遠之尚恐見况  
况可近乎既而果敗衆服其識二十六年授少中大  
夫福建閩海道提刑按察使黜官吏貪汙不法者凡  
數十人察繫囚之寃滯者決而遣之戒戍兵無得寓  
民家而創管屋以居之每謂爲治之本在於得人乃  
進言於朝曰福建所轄郡縣五十餘連山距海實爲  
邊徼重地而民情輕詭由平定以來官吏貪殘故山  
寇往往嘯聚愚民因而蟻附剽掠村落官兵致討復



蹂踐之甚非朝廷一視同仁之意也今雖不能一一  
擇任守令而行省官僚如平章左丞尚缺宜特選清  
望素著簡在帝心文足以撫綏黎庶武足以折衝外  
侮者使鎮靜之庶幾治安可期矣時行省討劇賊鍾  
明亮無功憚復條陳利害曰福建歸附之民戶幾百  
萬黃華一變十去四五今劇賊猖獗又酷於華其可  
以尋常草竊視之况其地有溪山之險東擊西走出  
沒難測招之不降攻之不克宜選精兵申明號令專  
命重臣節制以計討之使彼勢窮力竭庶可取也二  
十八年召至京師二十九年春見帝於柳林行宮遂

上萬言書極陳時政授翰林學士嘉議大夫成宗即  
位獻守成事鑑一十五篇所論悉本諸經旨元貞元  
年加通議大夫知制誥同脩國史奉旨纂脩世祖實  
錄曰集聖訓六卷上之大德元年進中奉大夫二年  
賜鈔萬貫乞致事不許五年再上章求退遂授其子  
公孺爲衛州推官以便養仍官其孫竒祕書郎大德  
八年六月卒贈翰林學士承旨資善大夫追封太原  
郡公謚文定其著述有相鑑五十卷汲郡志十五卷  
承華事略中堂事記烏臺筆補玉堂嘉話并雜著詩  
文合爲一百卷







